

皇明大政紀

皇明肅皇外史卷二十四

臣洧川范守已謹輯

金谿閔師孔謹校

秣陵博古堂謹鐫

庚戌嘉靖二十有九年春正月屬汝進削籍

嵩銜汝進劾已至是大計天下吏令吏部削其官

附錄湖廣巡撫林雲同列御史李廷春先知石首縣姦貪狀廷春亦列雲同鄙汚俱奪職聽覈

二月加李本吏部右侍郎兼東閣大學士

巡按浙江御史董威請寬海禁

初太祖置市舶司于倉黃渡以通華夷貿易有無詰

海貨抑奸賈使利權在上。且以省戍守費。後以黃渡通京圻。改置于福浙廣東。旣而絕日本入貢。而三市舶司不廢。海上利之。嘉靖元年。宋素卿宗設仇殺。夏言謂禍起于市舶。禮部遂請罷之。自是番貨至。輒爲奸商所籠。賒取轉鬻。動負數千萬金不之償。已而番賈主貴官家。意以讐奸商而貴家取負更多。甚于姦商。番人泊近島。坐索其負。不能得。遂出沒寇海上。貴官家乃責讓官府。謂不爲禦倭。及官爲出師。復恫喝番人間。以好言啗之。冀他日復主我而復沒其貨。番人積怒日久。乃盤據海洋。日掠我海濱不之去。而饑寒黠徒及失職衣冠士。失志生儒。諸不逞者。皆爲之謀間鄉導。弱者計飽暖。强者

奮臂欲泄其憤。于是汪五峰、徐碧溪、毛海峰等皆以華人據近島，襲王者衣冠，劫掠瀕海諸郡邑。而浙東無寧歲矣。朱統明晰其情，特嚴海禁，鑄恭貴官家二三渠魁。于是譁者四起，竟陷統落職。巡按董威乃希貴官指，請寬海禁，以便漁樵裕國課。下兵部覆議行。浙中藩臬諸司集議可否從之。

三月，策士奉天殿。

策士三百有二十人，賜唐汝楫等及第出身。

夏四月，刑部尚書劉訥刑籍，朴故都御史胡纘宗于闕廷，命嚴嵩兼支官俸。

時劉訥與都御史屠儵、大理少卿沈良才會奏王聯以

國朝正統二年四月
絞罪重囚秦許誣曰胡纘宗詩寓頌美無訕謗意其餘
情犯尤在可原下內閣擬旨嚴嵩謂訟爲河南人黨纘
宗帝怒曰旣云頌美何以有湘竹英皇句其爲比護
明甚纘宗廷杖四十與訟俱削籍爲民僑良才奪俸半
年承問司官及吏俱下鎮撫司刑鞠嚴嵩對制平獄公
忠可嘉命兼支大學士祿俸

封陶仲文恭誠伯辭許之

聖諭禮部尚書兼兼真人陶仲文禱雨濟旱力贊平
獄厥功大矣特封恭誠伯誥歲祿如例頒給仲文疏辭
從之

貴州叛苗陷印江縣及石阡府

祈萬鎧撫湖貴苗。湖苗帖服。貴苗雖稍戢而未大懲創。內寔驕蹇。不用命。及鎧召還。苗魁龍許保吳黑苗復倡亂。焚劫州縣。迄無寧歲。廷推兩廣總督侍郎張岳爲右都御史。仍開府辰州。撫勦之。岳至辰。集諸司議。多言林箐深密。累勦無功。撫之便。而不就撫。戍之使不出掠可耳。岳疏陳撫守非長久之策。必勦以兵。然後可議撫守。巡撫貴州都御史李義壯附鎧撫議。不欲變岳劾義壯不受節制。弗肯協謀。勦賊下兵部覆議。奪義壯官。回籍聽調。仁何苗攻陷印江縣。復寇石阡府。貴州震動。事聞。帝降詔切責岳。李義壯削籍聽理。

六月革鎮江總兵官

初秦璠王艮出沒江沙爲患地方兵部議置總兵官駐師鎮江儀真二處勦之已而盜平相沿不革至是御史趙錦上言鎮江總兵官不必設不可設不宜設反覆千餘言下兵部覆議從之

虜入大同塞總兵官張達擊虜敗績及副帥林春俱歿之初翁萬達召入部尋以艱去而周尚文亦病卒乃以待郎郭宗臯代萬達總督以張達代尚文將兵宗臯至鎮偵虜將大舉奏徵延綏寧夏保定各鎮兵戍大同從之至是虜酋俺答率衆數萬潰垣入大同塞計伏精銳於谷中而以羸騎百餘嘗我軍偵卒信之走白達達素以果敢顯徵兵未集達率麾下卒馳擊之伏發圍達數匝

馬蹶集刃歿。副帥林春聞達被圍。不介馬而馳援達。不克亦歿之。虜得二將首。輒引去。事聞。贈達官左都督。春都督同知。任春子指揮。尋以言官言。亦任達子俱賜諡。爲祠春秋祀之。

逮繫郭宗臯及巡撫都御史陳耀于詔獄。朴宗臯耀于闕廷。謫戍邊。諸部將俱論歿。

耀歿杖下。宗臯戍遼東。邊將戴綸徐仁歐陽安等俱論歿。長繫刑部獄。

以仇鸞爲宣大總兵官。

初鸞以訐銑坐廢。居京師邸。至是宣大缺總兵。鸞賂嵩子世蕃求起兵部。承指推用。乃加鸞太子太保。總宣大。

兵復奪

情起

翁萬達代宗臯總督以萬達不能速至先以

兵部左侍郎蘇佑攝其事以趙錦爲都御史代耀巡撫
帝以非常遣發慰勞篤至。

閏六月簡督學官

給事中楊允繩上言。

祖宗取士以經術爲重匪徒以

繪句絺章校長一日也邇來士子但逞浮靡之辭不勅
篤行下者狙贖恣睢干謁假託皆緣督學官尚文藝而
輕行檢也乞勅銓曹慎選督學官用端士習。帝曰督
學官實士子表率今後慎選行誼端方者以充其任勿
得徒尚文循資濫擢。

秋七月福建備海副使柯喬都指揮使盧鏗論外故都御

吳統自殺。

給事中杜汝楨御史陳宗夔劾統愾急周章聽信姦回
顯擅刑殺清操雖厲于平日而明憲難逃柯喬盧鏜黨
比匪人擅殺無辜罪當論死奏下兵部尚書丁汝夔覆
議如所勘奏。帝從之。命喬鏜繫福建按察獄待決。統
聞命惶懼適有官校來吳江逮繫故天津副使朱鴻
漸詣京偵者妄言逮統統聞之仰藥死。士論惜之。

八月申陶仲文前命加嚴嵩上柱國辭。公希忠等陞賞有
差。

丁丑虜入薊州塞。

初蘇佑至宣大卽請益兵餉未報而虜酋俺答狼台吉

復擁衆窺大同。仇鸞懼，遣廝養時義以重賂賂虜，令移寇他塞，勿復犯大同。虜酋以賂故，遂東去。鸞乃奏虜衆東行，恐侵宣薊，震驚京師，請移師駐居庸以備不虞。而謀者復白虜中語，欲寇薊遼間。兵部謂：帝厭警報，不悉以聞。已而警報數至，乃奏發諸邊兵萬有二千。京營兵二萬有四千，分布宣薊諸關隘。諸邊兵取符驗期會，未卽至而京兵悉市井傭保子，不能見敵，以爲常。虜至宣府，知有備，不敢近，乃走薊州塞。初，薊州外列朵顏、福泰三衛，虜亦不敢近。邇歲三衛懷反側，結虜自爲重，乃爲鄉導。故虜衆由三衛地寇薊州。是月乙亥，虜攻古北口。都御史王汝孝悉衆禦之。虜乃佯督衆綴我師，而別

遣精騎具鍬鑿。挾他塞垣入。我師後京。兵大驚潰。丁丑。虜衆悉入圍順義。弗克。遂長馳入內地矣。

戊寅。虜逼通州。大掠密雲。三河。昌平諸處。召諸鎮兵勤王。初。巡按畿內御史王忬聞虜攻古北口。疏請集議戰守策。而馳駐通州。曰。此國家咽喉處也。急誓吏民城守。收漕舟。艤潞河西。勿使爲虜用。夜半。虜至營州東二十里孤山。汝口諸處不得渡。乃分掠密雲。昌平諸州縣村落居民焚殺殆盡。王忬夜爲疏。縋使走京師。請援京師。始震急。集諸營兵城守。纔老弱四五萬人。又半役總兵提督家。不令出伍。索武庫甲杖。庫闔。又據例勒賄金。不時發。久之不能軍。丁汝夔乃以聞。帝大驚。遣都御史

王儀以三千騎援通州。而命文武大臣各十有三人分守都城九門及四隅。以吏部左侍郎王邦瑞定西侯蔣貴總督之。又命都御史商大節督科道官募民間材力子及坊甲保伍合四萬餘分直睥睨間。復令四方來試武舉千餘人分從諸大臣策應。帝猶慮不固檄召諸鎮兵速來勤王。

己卯咸寧侯鸞以大同兵至京庚辰都御史楊守謙以保定兵至京。

時鸞先駐師居庸故首得命。即以大同兵二萬三千至。守謙亦以兵五千至。人心稍安。已而河間宣府山西遼陽延綏諸將各以兵先後至。凡七鎮五萬餘人。

以咸寧侯鸞爲平虜大將軍。總督勤王諸兵。以楊守謙爲兵部左侍郎。提督戎務。

帝嘉勤王師各賜璽書褒獎。予金帛。使躡虜衆而拜鸞爲大將。總諸鎮兵。賜襲衣玉帶上尊及千金。又賜封記。文曰朕所重惟卿一人。得密啓奏以守謙爲兵部左侍郎。提督團營戎務。駐師城下以衛京師。復以都督陸炳提督皇城諸門。譏察不虞。都御史商大節督巡五城。防內。爨有論外。邊將戴綸等立功自贖。分遣京營諸兵屯城內外巷陌間。京兵懼見敵驅之出。皆泣不前。

戶部尚書李士翱等奪職。

時變起倉卒。勤王師各輕騎馳至。糗糒不具。有命犒賚。

之牛酒諸費皆不知所出。戶部文檄往復越二三日。纔人得數餅餌。開庾發粟。則囊橐金甌皆無所需。

故士卒饑甚。都督陸炳言。戶部失預計。軍與糧餽不支。士多餒死。帝怒。奪士勦以下。諸官職戴罪辦事。

辛巳虜犯京師。

虜自白河東渡潞水。西北行。大掠村落居民。焚燒廬舍。火日夜不絕。至東直門。執御廐內臣八人以去。郊民扶傷披血集門下。門閉不得入。萬口號慟聲徹西內。帝命啓門扉。納我民。是日虜掠婦女。大飲演武堂上。遊騎往返六門外。勤王諸兵無有敢嬰其鋒者。

壬午虜求入貢。命廷臣集議通貢得失。

初虜執御廐內臣去。不之殺。縛見虜酋。僉答答爲殿。遣二人持還求入貢。帝召大學士。嵩本及禮部尚書。階對便殿。因出虜書示之。命集廷臣議通貢可否。日午。羣臣畢集禮部。示以虜書。言欲以三千人入貢。許之則緩兵。不則益兵破其城。因陳筆劄。令各書所見。奏候帝裁。羣臣相顧莫敢發。司業趙貞吉抗言曰。此不必問。恐後生懦夫。闇不解事。萬一多書可許。則三千人入城。恐烏蠻驛中莫之容也。且虜肆深入。震驚宮闕。乃不務驅逐。而畏其恟喝。許之入貢。此何異城下盟。斷不可者。檢討毛起則謂時事孔棘。宜暫許之。邀使出塞。而後拒之。貞吉力叱起。羣臣俱以爲不可。奏入乃止。

以趙貞吉爲左諭德兼監察御史宣諭行營將士。

集議奏入時已向夜。帝望見德勝安定門外。燄火燭空大震懼。聞中官稍稍道貞吉毛起語。乃馳使召二人入對西內。各給筆劄。命疏所欲言。貞吉上言。陛下宜御奉天門。下詔罪已。追獎故都督周尚文功。賜祠錄後。赦給事中沈束罪。以作人心。且曰。士卒不力殺敵。以夙昔王將冒其首功耳。今誠得首功一。卽予百金。捐金不十萬虜且盡矣。奏上。大學士嵩卽請命貞吉齎金出城。諭買虜首。帝從之。御批疏上。擢貞吉左春坊左諭德。兼河南道監察御史。予金五萬兩。稱詔出城宣諭行營將士。博斬虜首。

癸未虜犯諸陵

虜由鞏華城犯

諸陵轉掠西山良鄉以西保定皆震

帝御奉天殿逮繫都御史王儀王汝孝及總兵羅希韓詣京王儀至京削籍

時帝久不視朝以羣臣請許之是日文武諸臣具服待命闕下。晡時帝始出御殿降勅切責諸大臣遂還宮羣臣出就午門下。跽聽宣勅皆惴慄計有所處分。迨散門且下鍵矣乃勅遣官校逮繫駐守通州都御史王儀巡撫薊遼都御史王汝孝及薊州總兵羅希韓詣京卽訊已而儀至下獄以畏懦不戰削籍去。汝孝以道梗不及逮猶得徐圖後效云。初儀至通州命營兵屯戍城

外而自閉閣卧城中。會仇鸞引兵至。虜少却。鸞兵以饑故。往往掠食諸村落。儀發捕兵執鸞兵下獄。死者十數人。鸞兵大譁。欲甘心儀。巡厥御史上其狀。帝怒。故逮治之。尋以巡按御史王忬爲僉都御史。代儀守通州。甲申。執兵部尚書丁汝夔。及左侍郎楊守謙于詔獄。

初。虜逼通州。汝夔聞警。恒懦甚。束手無所措。募偵者無慣卒。出郊不十數里。道遇扶傷者。輒奔還。妄言見虜某所。城中輒震。已而言不信。汝夔不加罰。復募他卒偵之。惴矣如故。城中數大震。而成國公希忠理京營兵。以兵多役占。不足行伍。恐見兵少。且獲罪。乃東西掣調掩飾之。兵疲不得息。家人漿食。莫知所饑。而不知誰所掣。

調也。爭詈丁某。丁某欲魚肉之。語頗徹禁中。旣而勤王師至。廩餉不能時。兵饑疲。出怨語。而大同軍尤無律。往往椎髮劫掠村落中。時被捕獲。或自詭爲遼陽軍。遼陽軍者。朵顏諸部也。先是有傳虜中語。遼陽軍實導我來者。故京師訛言遼陽軍叛。而鸞方被寵。雖獲大同軍行掠者。不敢置之理。必以聞。帝謂大同軍首入援。行掠亦出饑疲。令付鸞自處分。而鸞殊不呵禁。汝襲不得已。乃下令勿捕大同軍。大同軍益無忌。民苦之甚于虜。而恒自詭爲遼陽軍。民間不知。故遂謂汝襲山東人。以鄉曲故庇遼陽叛軍。及虜薄城下。乃汝襲益周章。恐或喪師。令諸將勿輕戰。而諸將恒怯不敢戰者。皆誘言汝襲

禁不發。民間益歸罪汝襲。恚詈遍街衢矣。而鸞機謫稱
率兵往擊虜。乃虜在城下。鸞顧遠屯郊垌外。不敢近城。
中莫知鸞擊虜與否。而楊守謙被命屯城下。不敢遠
去。又以兵少。故不敢一擊虜。帝聞之。謂鸞遠出禦虜。
而守謙畏懦不出師。與汝襲併切責之。時虜駐城下。多
殘毀諸中貴園墅。諸中貴爭環帝泣訴。汝襲守謙貳
于虜。先是帝望見城外火。已心恚。諸治兵者聞中貴
泣訴。乃命執汝襲下詔獄。而遣官自軍前逮守謙入
俱下法司。卽訊。命王邦瑞攝兵部。艾希淳代將守謙兵。
丙戌逮繫刑部侍郎彭黯。左都御史屠僑。大理少卿沈良
才于詔獄。廷朴之奪其祿秩。京師解嚴。

黯等論汝襲守謙罪當斬。而爰書冗長。胥史錄不速竟。時帝坐齋宮。趣具獄。稍延數刻。帝大怒。謂黯等比骹將有所規免。俱逮繫下獄。各廷杖奪祿有差。時虜已東去。京師解嚴矣。

丁亥。朴給事中張侃等于闕廷削侃籍。

是日帝命斬汝襲守謙。刑部都給事中張侃及左右諸給事等連疏請按例三覆奏。帝愈怒。逮侃等杖于闕下。侃百餘悉五十。仍削侃官。斥歸田里。

棄丁汝襲楊守謙于西市。

初虜犯城下。汝襲問計于大學士嵩。嵩曰。此非邊地比。戰敗可掩而欺也。莫若按兵勿動。虜飽當自去。故汝襲

下令勿戰。及被逮。求居間于嵩。嵩恐汝襲露前畫。給曰。毋慮。吾爲之地。汝襲亦信嵩素有回天力。安之。弗自辯。臨刑。乃大嘯曰。賊嵩誤我。遂與中謙俱棄市。仍梟汝襲首以徇。勿令收葬。放其妻三千里外。子戍鐵嶺衛。朴左諭德趙貞吉于闕廷。謫任嶺南。

初貞吉齎金五萬兩。稱詔出城。至鸞營。宣諭之。鸞曰。吾軍與虜逼。安能頓貯多金。不之納。貞吉無措足處。遂入城。至是復命。嵩謂貞吉狂誕。且追論其申理周尚文。沈束非是。帝怒。命杖九十。謫爲荔浦縣典史。

已丑。虜出古北。

虜掠得金帛羸畜。捆載北去。欲西奔白羊口出塞。而留

餘衆京城外疑我師。鸞率諸鎮兵尾之。白羊口守將扼其險不得出。稍棄牛羊婦弱闕下。擁衆復東南行。至昌平北與鸞軍遇。鸞不意虜還。倉卒不能陣。虜縱騎躡之。死傷千餘人。幾獲鸞。得戴綸徐仁救免。虜乃奪道循潮河川。由古北口故道出塞。諸將不敢逼。徐尾其後。斬遺弱八十餘級。以捷聞。

王汝孝逮繫至京。謫戍邊。

初命官校收汝孝。道梗不能至。汝孝復蹈虜。斬有首功。及逮至卽訊。竟得以後功末減。謫戍邊。不然與丁楊同科矣。

九月辛卯朔。虜衆盡出塞。

遣侍郎駱顯賑撫被虜郡縣。

遣戶部侍郎顯往撫被虜諸郡縣。掩骼埋齒。慰集創痍。賑貸之。

李士翱削籍。

吏部叅士翱。及工部尚書胡松。兵部侍郎謝蘭。併各司郎吏。差別處分。帝命士翱削籍。蘭改南京職方郎中。王尚學下獄。謫戍邊。餘奪級奪俸有差。

罷京營提督太監高忠。成國公希忠。遂安伯鏹。

時京營廢弛日久。中貴諸將領私役伍卒什四五。及成亡者。俱按空籍給月廩。而充行伍者。乃多尪羸不任兵。以爲常。提督朱希忠等。因循役占尤甚。戶部郎中汪宗

凱論劾不報。至是王邦瑞復以爲言。乃勒罷忠柄奪朱希忠陳鍾兩月俸。停其提督中外。咸謂未蔽法云。

立戎政府。加咸寧侯鸞太保。入理戎政。

初鸞總諸鎮兵尾虜首尾得二百級。鸞自効無功。帝優詔慰之。進位太保。賜金帛厚甚。及朱希忠等罷。乃改十二團營爲三大營。曰五軍。曰神樞。曰神機。總三營曰戎政府。以鸞理之。爲製印章。重其任。以王邦瑞協理戎政。爲鸞副。鸞請張鶴齡故第改建府牙居之。小廨四週居大同兵五百自衛。曰用以訓練京軍云。邦瑞奏用兵部主事二人。給事中御史各一人。議論多悖鸞主事申燧復持法不爲屈。疏京營弊政。乞釐革之。鸞怒密撻陷。

燧速繫廷杖出補外。鸞又言京管用給事中御史主事不便皆革之。所言無不從。盜驕橫矣。

以翁萬達爲兵部尚書。

初以萬達總督宣大。代郭宗魯。萬達不至。乃以爲兵部尚書。而以蘇佑爲真總督代萬達。

置薊遼總督大臣。

初設薊遼總督。以薊州保定遼東三鎮隸焉。改孫禮爲兵部侍郎。總督薊遼。未幾以何棟代之。

張岳進兵討貴州苗。

初苗陷印江縣。帝切責岳。岳深知撫戍俱非策。力主進討。其湖廣苗仍令叅政上崇如故撫處。而大集土漢。

兵討貴州苗。總兵官沈希儀督聽理叅將石邦憲等分哨並進岳命湖廣叅議張景賢貴州副使趙之屏監督之。

冬十月募諸道兵入衛京師。

勅遣四御史分道募民兵于畿輔山東山西河南諸府歲集京師練備秋防秋後各散去如踐更卒例云。

選各邊鎮銳卒入衛京師。

咸寧侯鸞上言選抽各邊銳卒入衛京師宣大二鎮共選若干人爲四部令歐陽安統領與各選卒依期入衛兵部覆言二鎮京師之門戶禦寇者不干門戶乃縱之入而與之格鬪堂奧之間鮮不危矣帝不聽命二

鎮卒姑不預徵寇若東犯卽星馳入援聽大將軍布置
違者重治于是各邊共選六萬八千餘人班上京師與
京營兵雜練之矣

以京營將分練邊兵。

鸞復上議大舉北伐先遣京營諸將分詣各邊訓練士
卒待師期于是邊兵盡隸京師塞上有警邊將不得徵
集而京帥在邊者又恣意陵轢朘削自營且不任邊責
人人自危矣

議征北虜。

咸寧侯鸞請駐師宣大間整飭兵甲俟冬月大舉往犁
虜廷以舒華夏之氣乃班師入衛以備秋防帝嘉之

命兵部會官集議。兵部左侍郎史道。戶部尚書孫應奎。
工部尚書胡松等上議曰。醜虜犯順。深入郊圻。震驚陵
寢。荼毒元元。惡貫盈滿。罪在不赦。皇上深懷大計。欲
興問罪之師。而復有敵愾禦侮如鸞者。身任其事。決策
請行。除兇雪忿。千載一時。臣等僉謀俱如鸞。議卽今整
齊士馬。臣道等之職。預儲軍餉。臣應奎等之職。精利器
械。臣松等之職。皆當矢心協慮。先事預圖。比及大舉。庶
不後時。而迅雷之下。虜將不及掩耳矣。帝悅。從之。于
是命戶部大括各處積貯。及歷年逋負。以備軍興。

附錄王邦瑞遵命抽選京營兵分隸三大營。禮部請擇
日告于太廟。從之。

十有一月置三輔經略大臣。

以易州昌平州及通州爲三輔。各設經略都御史。以翁萬達至愆期。謫駐易州。召許宗魯駐昌平州。及通州王忬爲三輔經略使。

議祔 孝烈皇后。

禮部議祔 仁宗祔 孝烈皇后于 太廟之九室不果。

以王邦瑞爲兵部尚書。

雲南盜那鑑大掠元江諸處。

王舍那鑑謀不軌。殺元江土知府。奪其印綬。嘯聚數千人。流劫郡縣。撫按官上其狀。命兵部議勦。久之乃平。

成寧侯鸞疏易四將

鸞請易置三輔重臣。以大同總兵官徐班駐易州。以徐仁代守大同。而宣府薊鎮總兵官李鳳鳴成勲互易其地。帝命兵部從之。于是王邦瑞上言。仇鸞論薦四將求濟戎務。皇上曲賜俞旨。宸筭淵深。有非臣下所能窺測者。謹遵奉施行矣。第念予奪者朝廷之大權。命將者天子之重柄。祖宗時總兵正副官皆兵部會同府部九卿科道諸臣集議朝堂。從公推舉。然猶不敢定擬。每上二人恭俟。裁定所以慎重其任。防杜其漸。示臣下不敢專也。今鸞坐名擬任。更易四將。則九邊握兵柄者有不目屬心向。妄生睚眦者乎。皇上聖明推心

賢帥何所不可。臣愚以爲國家典制關係正輕。聖人舉措萬世作則。臣待罪本兵。不敢不披瀝于君父之前也。帝曰。戎政初修。忠賢是托。況朕有密諮。匪彼專擅。爾兵部若隨事效忠。用無不當。亦不待彼更易。矧勞朕心耶。一籌未發。先攻毀大臣謀國之忠。固如是乎。旣而復諭廷臣曰。昔我二祖兵柄多出達能諸將。未有作謗者。邦瑞以虜退未受加擢。是又翟鵬之怨上也。今每曰破格舉事。而盡忠者乃不能容。儻虜再至。又效汝襲之誤國耳。故諭中外知之。邦瑞聞諭。莫知所措。

咸寧侯鸞帥師襲虜。

鸞帥諸鎮兵出宣大聲言擊虜。久不敢出塞。乃稍至近

境夜襲虜。斬老弱數級。無功而還。鸞自劾無功。置不問。
附錄陸炳請以大慈恩寺故址爲射所。從之。

十有二月。張岳大破諸苗砦。

岳以九月進兵。至是月。屢破諸苗。俘斬二千餘人。龍許保母妻姬女皆就擒。餘苗跳匿林菁。凍餒歿者殆盡。巢砦俱燬。窖藏俱發而火之。該道稱許保亦獲。第未逮至。岳乃具疏以捷聞。撤所徵兵歸鎮。留石邦憲搜捕餘黨。初。邦憲以印江陷被劾。解職聽理。岳歷數邦憲功。疏留之。至是。竟賴破苗云。

逮繫刑部郎中徐學詩于詔獄。

初。帝以虜患。諭羣臣。令人人盡言。學詩因上言。外攘

之備在急修內治。內治之要。貴先正本源。今大學士嵩位極人臣。職司政本。陰險莫測。貪黷無厭。內焉勲貴之結納。外焉羣小之趨承。苞苴盈門。舟車載道。亡論藩臬。叅遊諸冗員。所獻納。卽督撫總兵等官。每一遷擢。輒索千金。其他珍異奇玩諸物。尚難計數。此非股軍餉。則剝民脂而來也。輔政十年。日甚一日。釀成虜患。其來有漸矣。而嵩泄泄焉。自謂得計。其糾論序班龔桔疏。自云尺帛不受。門可羅雀。將誰欺。欺天乎。此猶無事時然爾。卽今虜勢猖獗。武備廢弛。宜懲往愆。今捐軀以贖前愆。而猶謬引佳兵不祥之說。以謾清問。貪饕如故。恬不畏明。縱子世蕃受奪職。總兵李鳳鳴白金二千兩。起補薊州。

總兵則鳳鳴必將掊剋邊卒。倍蓰取償。安望其礪兵養銳。以爲京師之屏衛哉。又受昏憊郭琮白金三千兩。以爲督運總兵。則琮亦必掊剋運卒。倍蓰取償。安望其釐姦清弊。以爲漕河之保障哉。世蕃又索史館吏胥陳世良等白金千有二百。王府科吏盛克相白金三百。網利之密。不遺巨細。前此所未有之貪也。自九月初旬以來。私徒南還輜車數十乘。輶車至四十乘。潞河樓船十有二艘。捆載而歸。悉假別署封職。以誑道路。于謀已得矣。如君父何。臣每接士大夫語。嵩父子亡不切齒痛心。而七八年間。無有少敢牴牾者。誠以世蕃狡鷲擅執大政。諸衙門奏啓必先關白。世蕃而後敢聞。嵩又機械足以

先發制人。勢利足以廣營自固。投機構隙。足以示威脅衆。文辭便給。足以飾非強辯。而精神警敏。揣摩巧中。足以趨避利害。而彌縫缺失。私交密會。令色脂言。足以結當路。懽心。而緘其口舌。如歷年論嵩者。往往假事陰中于遷除考覈之餘。給事中王燁。陳垣。御史謝瑜。童漢臣等。當時俱蒙聖恩寬宥。而今安在哉。故天下之人。視嵩父子。如鬼如蜮。痲心疾首。敢怒而不敢言者。誠畏其陰中之禍也。伏乞罷嵩父子。別簡忠良。以委任而責成之。則內有順治。而外自威嚴。尚何醜虜之足慮哉。帝謂其乘伺報復。逮下鎮撫司考訊具奏。

辛亥嘉靖三十年春正月。朴錦衣衛經歷沈鍊于闕廷。編

置塞外

初虜薄城下求通貢。下廷臣集議。趙貞吉以爲不可。毛起以爲姑許之。遂令出塞而後拒之。時鍊在衆中。大言申貞吉指喋喋不休。吏部尚書夏邦謨目之曰。此何小吏而言若是。鍊曰。大臣喋喋言。故小吏言之。奚怪也。已而上疏請以萬騎護陵寢。萬騎護通州軍儲。而合勤王師數萬人。邀擊虜以情歸。勢必大捷。中國之氣可伸。不報。當是時大學士高獨用事。數寢格邊檄。而當時重臣慮誅。輒入賄求。高居間。冀有所解免。苞苴日甚。鍊抗疏劾。高受國重任。視如鴻毛。貪婪過鄙。若膏盲鐵石。不聞咨諏方略。爲治國安邊之策。惟與子世蕃日夜圖惟。

以求自全。且以朝廷之賞罰爲自己出。故人人皆計嵩愛憎。而不知有朝廷之恩威矣。因歷數其十大罪。及夏邦謨承受願指關通賄賂狀。請并誅斥。帝怒杖于關廷。編管保安州爲民。

二月王邦瑞罷。以趙錦爲兵部尚書。

邦瑞疏備虜五事。帝曰。兵部正官。焉用建白。是因文塞責耳。因詰責之。邦瑞懼。上疏乞休。從之。

徐階請立皇太子。不聽。

大計夏邦謨罷。

三月。以李默爲吏部尚書。

議裕軍儲。

請北伐議急。國計告乏。建議諸臣。或欲徵歷歲之負。欠。或欲加賦于民。紛沓不一。給事中劉體乾上疏曰。近自北虜陸梁。宜陛下赫然震怒。欲大舉而撻伐之。顧國計告匱。建議諸臣。一切爲不得已之計。姑以紓困急。佐經費也。臣愚不知大計。但聞蘇軾有言。所謂豐財者。非必求財而益之也。去事之所以害財而已。由軾言觀之。則革冗吏。清冗費。乃當今理財第一義也。我朝成化五年。武職已逾八萬。合文職蓋十萬餘矣。計至于今。邊功之陞授。勲貴之傳請。不知其幾。是武職不止于八萬也。各衙門之添設。大臣之恩廕。不知其幾。是合文職不止于十萬也。以是推之。成化視洪武爲冗。今視成化

爲尤冗。遠視宋制三萬四千員。唐制一萬八千員。漢制七千五百員。與唐虞之建官惟百。夏商之官倍用。奚啻倍蓰。他如閹宦之收入。漸廣錦衣之選。充漸多。中書等衙門之帶俸。漸濫。與夫禮部之譯字生。鴻臚寺之通事。序班。光祿寺之厨役。神樂觀之樂舞生。內而各監局之勇士匠人。書寫人役。及以大工陞除者。狐媚猿攀。途轍不一。蠅營鼠竊。窠臼尤多。臣不能悉數。蓋已萬萬千。祖宗時矣。其所以糜爛財賦者。豈少少哉。乞勅大小衙門。一應冒濫人數。逐一查革。務從簡約。庶見爲國節財之意。所謂革冗吏者。此也。又聞嘉靖元年至十五年。光祿寺積剩銀不下八十萬。自二十一年以來。供用日增。

以致不足。其本寺進御蔬果。初無定額。惟以內監片紙據數交納。而內監官輒以所進鬻之行戶。復爲取索。所以前後多寡頓異者。內官之滲漏乾沒其間也。其他供應衙門轉移侵盜。未易悉數。乞勅禮部再三酌議。着爲令典。每遇年終。仍選科道官查覈。奏繳。則沉匿掩蔽之患。自無所容。而帑藏之貨。將沛然有餘矣。所謂清冗費者此也。二冗旣除。所省不下十萬金。朝焉在彼。暮焉在此。見效甚速。爲力尤易。民旣不擾。而國亦不乏矣。不報。

初與虜通馬市。

初。鸞聲言北伐。實內畏虜。乃密遣時義結俺答。義子脫

脫使俺答以貢馬互市爲請。俺答利我貨幣。投譯書宣大總督蘇佑。言求通市。佑以譯書上聞。帝命羣臣集議。力主之。羣臣弗敢異議。上從之。議遣使主市事。乃起前兵部侍郎史道兼都御史往大同地方。處置邊務。總理互市。

湖貴叛苗入思州府。執其知府李允簡以去。

初張岳討諸苗平。惟龍許保吳黑苗未獲。岳奏請撤兵而留石邦憲等搜捕其黨。至是許保復糾湖苗附已者百餘人。出劫思州其城中。居民不數十家。舊有瞿塘衛戍卒。時苗平。防戍頓懈。知府李允簡方視事。羣苗詐稱瞿唐卒來更戍。突入城中。殺戍吏民百餘人。執允簡及

經歷知事掠帑藏以去。石邦憲聞之。急遣兵邀其歸道。羣苗懼。縱允簡等還。各走小徑遁入林箐中。邦憲兵邀擊擒斬數十人。張岳乃檄永保二宣慰司及酉陽宣撫司會兵討湖苗逆者。既而各擒斬湖苗數十人。餘黨悉以撫定。惟龍許保吳黑苗未能獲。岳檄邦憲等縣賞購之。

大計京官

先是吏部請計京官。帝命二月內舉行。至是嵩父子恫喝吏部中傷善類甚衆。嵩銜徐學詩劾已削籍未紓其忿。併黜其兄中舍應豐。吏部奏上。帝察其枉抑中肯。留用。然亦不問奏黜所由也。

通繫兵部員外郎楊繼盛于詔獄。謫補外。

初繼盛爲南京驗封主事。三年職滿入計。擢兵部車駕司員外。適許虜通市。繼盛上疏力言通市有十不可。一忘天下之大讐。二失天下之信義。三損國家之威重。四墮豪傑效用之志。五懈天下修武之心。六開邊方通虜之門。七起百姓不靖之漸。八長胡虜輕中國之心。九墮胡虜狡詐之計。十忘天下根本之圖。十難相繼。歷數彼我情狀。如指諸掌。復舉羣臣建議互謬條析其失。請收通市成命。銳意進討。帝頗然之。下內閣及禮兵部會大臣集議。嵩等唯唯。莫敢以爲是。咸寧侯齊寧曰。監于目不識虜。宜其易言。若是密疏駁之。帝中變。下繼

虜魄勿窺我邊圉。至是帝以虜酋款塞欲撤之。忽報虜有異謀。帝諭廷臣曰。朕于十有九日欲撤鎮虜法壇二十日。卽有警報。玄威所祐亦不可忘。初宣大總督何棟至鎮。數請修舉邊防。下兵部覆議從之。然皆備邊常譚。至是給事中何光裕乞勅棟廣施謀略。勿得專事修築從之。

六月。沅江盜那鑑殺雲南布政使徐樾。

初那鑑悖叛。守巡官議用兵征勦。巡撫都御史顧應祥獨曰。此困獸可緩而縛也。焉用兵爲。會應祥遷南京兵部侍郎。去都御史石簡代至。督兵進討。那鑑詐降。計請重臣入城。撫諭羣盜。簡信之。檄布政徐樾往。徐樾亦不

自爲備直抵沅江城下。那鑑指顧羣盜執械殺之。巡按御史趙炳然以狀聞。帝怒。奪簡官。予槌祭墓贈廕焉。**附錄**復諭戶部市龍涎香。數歲如何不爲奏進。尚書孫應奎上言。已嚴行各撫按官訪買。遣官十五人勒期催取矣。數歲不至。不勝警惕。帝曰。此物民間俱有。但因部內求覓不肯將出耳。

秋七月。虜酋俺答獻我叛人蕭片等于塞上。

初。華人蕭片張拔隆王得道。喬源。丘富等六十餘人。潛出塞降虜。俺答以爲小酋。丘富每教虜以火食屋居。虜竟不敢屋居也。爲築板升處之。是春馬市南通。俺答頗利之。片等弗肯靖。仍謀入塞。剽掠。俺答不悅。仇鸞遣時

義啗俺答以利。諷令縛獻芹等。俺答以爲然。遂擒芹及張板隆王得道等三十餘人。械至大同塞下。納降譯書。總督史道所轉聞于朝。其喬源丘富等三十五人俱走免。史道收芹等于大同獄。分遣緝捕官卒四捕源富等。不獲。乃上言。內閣元輔贊翊睿謀。戎政大將。功收互市。其家卒時義結信虜酋。縛歸兇逆。功當首論。下其章于兵部。

加咸寧侯鸞太子太傅。及增歲祿。任其一子進史道兵部尚書。以時義爲指揮僉事。

兵部覆奏。蕭芹等世居中國。久荷生成。乃叛入外夷。謀爲不軌。馬市甫成。侵犯繼至。幸荷皇上至德潛孚。玄

威遠播誘俺答之衷寢妖氛之氣遂收不戰之功實非人力所能致者。仇鸞赤心報國銳志安邊史道威宣沙漠信孚犬羊蘇祐何思等整輯兵餉協助猷謀家卒時義蹈不測之虎穴喻無信之犬羊均有可嘉乞勅禮部卜日告報玄貺鸞道等特加恩廕擢賞以爲人臣竭忠任事之勸。帝曰各臣忠誠盡職允可嘉尚其加鸞太子太傅祿米二百石廕一子錦衣衛千戶進道兵部尚書仍督邊務各賜白金五十兩紵幣八束蘇祐何思各各賜白金四十兩紵幣六束時義陞指揮僉事仍賜白金百兩其餘陞賞有差。

八月叛人蕭芹等伏誅。

冬十月。獲朶顏叛夷哈丹兒陳通事。有事于郊廟社稷。
初哈丹兒陳通事潛結北虜。導入薊州塞以致深掠畿
輔。禍及京師。至是復來塞內。偵我虛實。爲遊徼卒所擒。
總督薊遼侍郎何棟以聞。因械繫二逆至京。禮部上言。
二逆就擒。實賴玄貺所致。宜告謝雷霆洪應。壇遣官告
于兩郊太廟社稷。帝王廟。次日羣臣具服稱慶。行獻俘
禮。從之。

十有一月。哈丹兒陳通事伏誅。

加咸寧侯鸞太傅。太子太師。增歲祿。進何棟兵部左侍郎。
各任一子。任太學士。嵩一子。錦衣衛指揮。加大學士。本尚
書禮部尚書階少保。任一子。加成國公希忠。太子太師。左

都督炳太子太保。兵部尚書史道。兵部尚書趙錦俱太子少保。各任一子。

兵部尚書趙錦上言。哈丹兒陳通事日尋干戈。屢犯疆場。鈞致虎豺深入內地。以致威輔震驚。流毒內外。賴我皇上精誠格于上玄。神貺昭于丕顯。蠢茲二逆。一日就擒。師旣無征。功收不戰。大小臣工。莫不仰荷玄恩。孰敢貪天功以爲己力也。第據迹而論。咸寧侯仇鸞總督何棟。總兵官陳勲。都御史吳嘉會。大學士嚴嵩。李本。尚書徐階。尚書史道。成國公朱希忠。左都督陸炳。并臣錦等。均蒙天祐。以效微勞。但恩典出自朝廷。臣等不敢擅擬。帝降旨。仇鸞忠勤懋著。加太傅。太子太師。歲增祿米百

石。廕一子錦衣衛指揮僉事。何棟陞左侍郎。仍總督邊務。廕一子錦衣衛千戶。成勲陞都督同知。吳嘉會陞右副都御史。嚴嵩官階已極。廕一子錦衣衛指揮僉事。李本陞尚書。徐階加少保。廕一子入國子監讀書。朱希忠加太子太師。陸炳加太子太保。史道趙錦加太子少保。各廕一子錦衣衛百戶。其餘陞賞有差。

十有二月虜寇大同塞。

初史道主宣大市事。虜以驢馬多索價值。弗予輒大譁。入大同市。寇宣府。宣府市寇大同。甚者朝市暮寇。幣未出境而警報隨至。併所得驢馬掠之去矣。虜衆日往來大同城外。訊之輒以貢市爲言。將士不敢拒。各邊垣及

諸營堡俱壞。戍卒俱撤散。虜可長驅至城下矣。史道復上言。虜無馬者。許以牛羊入市。酬以粟豆。科道交章論阻之。虜又請開市于遼東。時許宗魯巡撫遼東。移書兵部。反覆陳不可。狀事得寢。虜知市利不博。是月三寇大同。巡按御史李逢時上言。數日之內。虜三入寇。似與通市情實相左。乞勅鎮巡等官。多方備禦。仍遣使虜中。宣示恩威。令其約束部落。勿啟邊釁。每歲六九月通市外。不許頻復求請。及零騎侵犯。儻若服從。與通市如故。若面從心違。據實奏報。一意戰守可也。下兵部議。尚書趙錦覆奏。自古禦戎之道。戰守爲上。羈縻終非長策。今開市甫畢。而虜寇三人。防微杜漸。誠宜審處。帝命總督

官偵探備禦。仍嚴私自通虜之禁。違者巡按御史指實
叅究。

李默罷爲民。以萬鏜爲吏部尚書。

壬子。嘉靖三十有一年。春正月。虜寇大同塞。

巡按御史李逢時上言。虜寇敢於歲初擁衆入犯。俺答
之約束全無。馬市之羈縻難恃。今日之計。惟大集兵馬。
一意討伐。宜行宣大薊遼各總督鎮巡等官。督令將士。
合兵征勦。仍勅京營大將仇鸞。訓練甲兵。專事征進。勿
得隱忍顧忌。釀成大患。帝曰。虜賊非時擾攘。官兵不
能防禦。顯是平日專恃馬市。全不隄備。故爾。今後一意
戰守。如仍前觀望。重懲不貸。

附錄御史李承華上言。薊鎮邊關。先年奏留興營及各衛邊卒。分隸防戍。已成土著之業。今仇鸞奏留班軍。盡數改撥。有拂人情。恐生他變。事下兵部覆議。從之。

二月。虜屢入大同塞。指揮王恭禦歿之。

是月。帝諭兵部曰。虜情變詐。反覆不一。爲今日計。惟有大震兵威。用張殺伐。庶有以舒華夏之氣耳。尚書趙錦上言。大將仇鸞領各邊兵入衛。卒六萬八千人。天下精兵。無以踰此。而宣大戍卒。又十有一萬。大震兵威。用張殺伐。此其時也。若復觀望依違。坐悞事機。臣等萬死何足贖罪。第鼓勇建功。以仰副我皇上眷遇之隆。則在大將鸞所當自盡耳。帝曰。兵馬旣多。卽令大將分

布逐勦。勿悞事機。時驚懼寒畏懦。不敢發兵征進。又恃
通市。故亦不嚴勅邊將。協力防禦。而大同總兵官徐仁
復驕縱。聲言旣與虜平。無庸戍守。力恣意剝削。爲索裝
計。巡撫都御史何思亦以通市。故近邊將報虜有小警。
輒匿不聞。有拒殺虜者。抵死。以故虜衆出入關隘。無復
顧忌。動以貢市爲名。往來官寺。有司廩餼。惟謹。稍有拂
意。輒爾大閱。其黠狡者。變易衣帽。直入堡城內。姦辱婦
女。莫敢誰何。至是虜衆萬餘入塞。抵懷仁縣管家堡。大
掠居民。總兵徐仁。副總兵王懷邦。參將張騰。游擊劉潭。
京營左擊孫麒。各擁兵觀望。不爲逐勦。潭又陰遣廝卒。
結虜鬻路。獨中軍指揮王恭。率所部禦虜。戰于管家堡。

力屈於之虜得利遁去。總督侍郎蘇佑上其事。帝命兵部遣急謀者偵虜衆多寡。是夜以聞。

械繫大同總兵官徐仁、叅將張騰等詣京考訊。

代府饒陽王上言。徐仁恃虜兵平。朶剌軍饒。及至有警。移疾避艱。游擊將軍劉潭鈎虜通市。妄稱貢馬。都御史何思不察虛實。誤聞于朝。頒給綵緡。招徠夷人。任其出入官寺。醉飫鮮醇。是以餘寇歆豔。大肆猖獗。而巡按官猶以通市故。不容傳報。較轆中夏。大圯邊防。莫此爲甚。下兵部覆議。各官俱宜重懲。帝命錦衣衛遣官械繫徐仁、張騰、劉潭等詣京。卽訊。何思削籍爲民。王懷邦奪官。發宣府立功自贖。

三月以禮部尚書徐階兼東閣大學士參預機務仍理部事。

時階爲少保兼太子太保禮部尚書兼翰林學士至是加東閣大學士餘官如故。

罷馬市。

時邊防久廢言官屢以爲言咸寧侯亦慮禍及密疏止之乃罷市詔史道還尋致仕去帝命復言開馬市者論成著之潔令。

補大同戍卒。

兵部上言往歲宣大非無虜患而本鎮戍卒自足戰守自簡銳卒入衛京師衆分勢散致調各鎮士卒赴援奔

命罷勞。覩饗繁費。數年以來。費金七百餘萬。後將何繼。不若以本鎮軍舍餘丁。土著壯夫。補足原額。庶供億可省。而戰守足恃矣。從之。

附錄巡撫御史李逢春。按覆參將張騰。副總兵王懷邦。游擊孫麒。各擁精兵。志忘敵愾。游擊劉潭。陰遣廝卒。通虜。鬻路法典。俱難輕貸。指揮王恭。素著苦節。臨難致命。宜錄祀。贈廕以勵臣忠。帝曰。王恭忠可嘉。予其贈。都督僉事任一子正千戶。祠祀。禮部題行。

夏四月。倭寇破黃巖縣。大掠象山定海諸處。

初。朱統既論。參罷。巡撫都御史不復設。又以宿應參之請。復寬海禁。而舶主土豪。益連結倭賈。爲姦日甚。官不

以目視莫敢誰何。有王直者徽人也。以事亡命走海上。爲舶主。渠魁。僭奴愛服之。與其黨徐學毛勲徐海彭老等不下數千人。俱列兵近洋。掠我居民。至是遂登岼犯台。破黃巖縣。殺略慘甚。復四散象山定海諸處。浙東爲之騷動矣。

補築宣大邊垣。

初總督翁萬達建議修築宣大山西邊垣一千一百餘里。烽堠三百六十三所。頗稱完固。後以通市故。爲虜撤毀所在廢缺。兵部奏檄鎮巡官極力修補。給事中李幼滋遂上言。敵壘卑小。宜于垣上增築高臺。營建房廬。以棲火械。兵部覆行鎮巡官斟酌行之。

大將軍鸞帥師襲虜塞外。我師敗績。

是月乙卯。偵報虜衆數千。住牧威寧海側。鸞利虜少欲襲有其功。乃帥各營親卒。及檄戴綸等統衆萬餘。夜馳二百里。比曉。及威寧海。虜覺。悉衆突出。鸞等倉皇退走。殺傷官軍一百二十六人。射歿馬一百二十匹。殺歿旗丁二十八人。鸞等奔還。于途斬獲零騎六級。上疏言狀。且張其功。伐兵部覆言。斬獲甚少。損傷衆多。難以言功。且出師伐虜。與倉卒禦敵不同。亦不可以血戰論也。帝曰。斬獲雖少。勤勞宜錄。賞鸞白金五十兩。紵絲八束。戴綸等各賞有差。

虜入遼東塞。備禦官王相歿之。

虜衆數萬。由遼東前屯衛大河口。撤去邊垣七十餘里。掠至寧遠。備禦官王相力戰死。總督薊遼都御史何棟上聞。帝命贈相都督同知。及祭塋錄蔭。

五月。調戶部尚書孫應奎于南京。

秋七月。以都御史王忬巡視浙江海道。及興漳泉地方。

倭寇猖獗日甚。

廷議復設巡視重臣。乃以忬提督軍

務。巡視浙福海道。時忬巡撫山東。聞命卽日至浙。度所治軍府皆草創。而浙人柔脆。不任戰。所受簡書輕。不足督率吏士。乃上疏請假事權。誅賞得便宜。且欲嚴應援之律。寬損傷之條。且勦且撫。勿拘從之。忬任叅將俞大猷。湯克寬爲心膂。徵狼土諸兵。及募溫台諸下邑桀黠。

少年分隸諸將布列瀕海各鎮堡嚴督防禦浙人恃以爲無恐。

虜寇薊州塞。

先是遼東報至仇鸞請行邊乞兵戶工部三侍郎從行兵部主徵發戶部主糧餉工部主兵械三侍郎各簡其屬皆隸鸞幕府自布科條煩碎嚴苛動以軍法爲言帝俱從之鸞以朵顏三衛導虜寇邊欲乘虛搗其巢穴總督何棟以爲不可貽書勸止之六月內諜報虜欲寇薊州塞鸞當出禦虜遁疽發背至是邊報愈急鸞疾劇不能出師猶顧戀大將軍印不欲辭仍上請輿疾出師免陛辭從之然卒不能出也。

八月。奪咸寧侯鸞大將軍印。鸞死。

兵部尚書趙錦上言。邊事孔棘。大將病不能出禦。而印大將所。諸偏裨令不行。乞暫假大將軍印。置將出禦。虜帝謂本兵不可出師。卽收大將軍印。置將出禦。虜夜至鸞第。收鸞印組。鸞聞命大恚。病益劇。尋歿。錦乃奏以總兵陳時代鸞督師禦虜。

磔仇鸞屍。梟其首。父母妻子俱棄市。

初鸞家卒時義侯榮姚江俱冒功次。授錦衣衛指揮。知鸞家事必敗。乃出奔居庸。鞏華城欲叛降虜。關吏及邏卒獲之。都督陸炳以聞。下詔獄鞫之。炳乃盡發鸞通虜亂政諸罪狀。帝大怒。命法司會訊。刑部具其獄。稱鸞

久畜異志。交通桀虜。殘毒生民。震驚畿甸。事干謀逆。未正國典。宜剖棺斬首。梟示九邊。以爲人臣不忠之戒。時義姚江族榮俱係逆黨。宜併斬首。鸞妻妾子女付功臣家爲奴婢。財物入官。其父母祖孫兄弟不限籍之同異俱流三千里。家人仇林等編發戍邊。帝曰仇鸞大逆不道。仰賴玄威。雖已殛歿。難以照常處分。卽剖棺剉屍。斬首梟示九邊。父母妻子俱斬。妾及孫女發功臣家爲奴婢。時義等卽爲處決。仍各剉屍。仇林等編發嶺南。永充軍伍。仍布詔天下。累鸞罪惡。虜聞鸞歿。遂引去。

湖貴叛苗平

初張岳檄石邦憲等。購求龍許保吳黑苗。邦憲密遣使

入砦。賄聽撫苗麻得盤具老獐等。偵知許保至其姻家
吊喪。給至別所。醉而縛之。預白邦憲。以兵取許保去。岳
疏聞。誅之。惟黑苗無可踪跡。偵知其以緝急深匿。乃緩
其令。所羈親黨俱釋放。密督諸土目索之。至是廉得其
處。遣兵劉甫等徑入砦襲斬之。持其首出。諸苗欲攘其
功。追甫等奪去。以火薰乾藏之。索重價。僉事龍遂賞以
百金。仍令土官田興邦督索。得之。驗實白岳。始以竣事。
聞初指揮田應朝者。以持捕柄日益橫。有司不能制。陰
構永順保靖二宣撫司相仇殺。而中取其賂。又合酉陽
兵攻平茶。虐殺無辜甚衆。及官兵討諸苗。應朝多沮撓
之。岳廉知。應朝雖譎。然無勇力。恃其叔田勉爲之爪距。

岳先以計繫勉杖歿于獄。應朝懼。自竄苗峇中。遣徒自列。岳令其自效贖罪。復不出。乃革其緝捕權。應朝勢促。諸土目多仇之。其族人亦不直應朝。應朝乃束身來見岳。恐激他變。杖而釋之。令從征進。及諸苗破。乃以計擒應朝。杖殺之。湖貴苗俱平。岳上其事。廷議增設總督。重臣鎮撫其地。卽以岳爲之。數年乃得代去。

以萬鏜爲吏部尚書。

時李默削籍閑住。乃以鏜代默。

河溢徐淮。

時久雨。河水大溢。淮安徐邳及山東曹單諸州縣俱罹其患。

九月更新營戎政。

帝諭大學士嵩更新戎政。悉改鸞所措置。

朴兵部侍郎蔣應奎通政使唐國相于闕廷。削籍爲民。

初應奎協理戎政。竄其子繼詔姓名于兵籍中。唐國相以子熙敬爲仇鸞廝養卒。俱冒稱首功。授官千百戶。至是給事中凌汝志劾其廉耻掃地。乞加案治。帝怒。命廷杖各四十。發原籍爲民。其子行巡按御史收鞠奏報。應奎歿杖下。

南京試御史王宗茂謫補外。

宗茂上言劾嵩數其負國八大罪。且曰。陛下以三皇五帝之隆。而容此共工驩兜之徒。不知天下後世將以

陛下爲何如主也。臣非不知嵩之願指氣使。臣無死所。父母失養。妻子孤苦。有甚于天下。臣民罹嵩之害也。然時事至此。將舉天下爲戎馬之場。臣將舉家焚燎。自經林木。殆有甚于失養孤苦者。此時若用臣言。罷斥臣之父母妻子。將享治安之福。有愈于臣之生存矣。帝謂其狂率。謫爲平陽縣丞。

兵部尚書趙錦謫戍邊。

言者論其初附仇鸞。故爾。其他緣鸞進秩者。奪官治罪。有差。

冬十月。徐階解部事。

階始專直內閣。預機務。以歐陽德爲禮部尚書代階。

大同總兵官吳瑛帥師襲虜于塞外。我師敗績。

時總督蘇祐與巡撫都御史侯鉞總兵官吳瑛協謨仰遵成命出師擊虜。鉞遂徵集兵馬數萬人出塞襲擊虜幕。虜酋俺答及把都兒等知覺。會兵逆擊我師。殺把總指揮劉欽。旗牌指揮范世傑。管隊千百戶張勣等七人。士卒死者無筭。瑛等急飲衆自衛。迺還歸塞內。巡按山西御史蔡朴上言其狀。因劾蘇祐侯鉞等寡謀喪旅。宜加重罰。兵部覆議。大同邇年以來。兵威積弱。人無鬪志。是以虜益驕橫。舉動侵掠。如蹈無人之地。今總督鎮巡等官乃能躬冒矢石。出塞擊討。原遵欽依成命。搗巢犁庭。以牽其深入之心。非故輕爲過舉也。不意虜酋集兵。

迎擊彼衆我寡未獲全勝以致欽等七人陣亡雖偵探不明發縱未審之咎難以他諉而深入沙漠震驚瓊表之膽亦可嘉予伏望軫念重鎮罷弱之餘官師出塞之勇略其傷損加其力戰特寬佑等之罰以作匪躬帝從之佑等不問劉欽范世傑等先行優卹

十有一月以楊繼盛爲兵部員外郎

初繼盛謫狄道典史三年虜敗約屢入寇仇鸞屢從事露族誅之帝思繼盛言驗遷知諸城縣月餘授南京戶部主事之官三日遷刑部員外郎隨改兵部武選司癸丑嘉靖三十有二年春正月戊寅朔日有食之

先是歲前秋月山東徐淮及廣東俱大水冬日下有赤

氣及四方地震。疊見章奏。至是元日日食。不盡者二秒。
南京御史徐栻上言。日者衆陽之長。以清明普照爲德。
元日者三陽之首。以生育長養爲事。乃于此時謫見于
天。數十年來。未有天變若是異者。夫日食爲占。先儒謂
爲小人凌君子。夷狄侵中國之象。以實應之。則進君子。
退小人。莫要于大察。乞勅部院秉公去留。以明黜陟之
典。而京堂大臣。依故事自列。毋妨賢路。綏中國制夷狄。
莫先于自治。乞勅邊臣撫士卒。嚴團練。固城堡。謹烽堠。
以爲先事之防。疏上不報。久之謫補外任。

逮繫御史趙錦于詔獄。

時錦巡按在外。見有日食之變。亦上言。春秋日食三十

有六。未有無其應者。至于食在正旦。古人所謂變見三朝。其應尤重。臣謹以天意驗之。人事醜虜驕橫。閭臣怙寵。有若影響之不易者。敢昧死爲陛下陳之。我太祖高皇帝始罷丞相。散其權于府部諸司。而總之朝廷。上不失其操柄。下不嫌于逼僭。此聖祖之慮。所以獨超前代也。今之內閣。無丞相之名。而有其實。非高皇帝不設丞相本意。然當時諸臣猶未敢招權市寵。賄賂公行。今大學士嚴嵩以奸佞之雄。繼登台鼎。恃恩寵以張其威權。假刑賞以行其愛憎。事無巨細。咸欲取裁于一已。少有違拂。必陰中之。故銓司之黜陟。本兵之用舍。皆先關白而後具題。清要之職。優厚之地。非其私人。

賄客則不可得。邊臣遇有功罪。必先腴削士卒以行賄。賂入則願指諸司。曲爲擬議。體勘之臣。明知其冒濫。而不敢上聞。執法之司。心灼其冤抑。而不敢申理。至于宗藩勲戚之封襲。文武大臣之贈諡。亦惟視賂之厚薄。爲遲速予奪。而莫之他顧。諸司之章疏。必先呈閱。而後聞四方之奏請。各具副封以自達。其諸中外臣僚之陞除。酬謝。朝覲。公委。給由之餽遺。奇珍異彩。水運陸輸。以爲常。而希寵干進之徒。妄自貶損。稱呼非類。頌美功德。比擬不倫。奴顏婢膝。于其前。而廉耻掃地。則臣所不忍言也。昔者散丞相之權。而分之于府部諸司。今則合府部諸司之權。而總之于內閣。雖前代丞相之顯恣。何以加。

諸惟陛下深思而徐察之。至于醜虜驕橫。固聖心之所軫慮者。其于防禦。諒已周詳。而封疆之臣。未見有堅甲利兵。足以制醜虜之致命者。何哉。朱熹有言。其本不在邊鄙。而在朝廷。其具不在兵食。而在紀綱。今閣臣行私。邊將用倖。以培植爲得計。以營求爲材能。故朝廷之上。用者不賢。賢者不任。賞不當功。罰不當罪。紀綱大壞。雖有百萬之衆。何益于事哉。臣願陛下觀上天垂象之顯察。二祖立法之微。念操柄之不可使移。思紀綱之不可使亂。將蒿罷免。以應天變。慎簡忠良。以備顧問。勿使復侵府部諸司之柄。則朝廷清明。紀綱自正。醜虜雖橫。臣知其不足平也。疏上。帝方以供奉青詞。

悅嵩命遣官校逮繫錦。下錦衣獄久之。削籍爲民。以聶豹爲兵部尚書。

豹初知華亭縣。歷官按察副使。以事削籍。家居數載。虜犯都城時。以大臣薦。與何棟俱起家治兵禦虜。日見信用。遂躋本兵。

逮繫兵部員外郎楊繼盛于詔獄。考訊論死。

初嵩見馬市無成功。仇鸞敗誅。念繼盛言驗。欲致令親已。故一月數遷其官。且欲沽庸材名也。乃繼盛益不平。嵩始遷刑部。卽欲移疾歸。旣而調武選。遂日夜具疏草。疏成。以是月十八日齋沐上之。言臣前阻馬市。逆鸞嗾獄吏欲處臣。陛下特寬其誅。不二年間。復令官。臣夙

夜祇懼思所以捨身報塞而莫知所爲則未有急于請
誅賊臣者方今外賊惟虜內賊惟嵩未有內賊不去而
外賊可除者也嵩之罪惡盈滿沈鍊徐學詩王宗茂等
論之已詳第皆言其貪污小小耳臣敢以嵩之顓政叛
君十大罪爲陛下陳之太祖罷中書丞相載諸祖
訓計至深遠嵩爲輔臣儼然以丞相自居此壞祖宗
之成法罪一權者人君馭天下之具不可一日下移嵩
以擬旨自任遂竊威福以市一己之威惠天下羣臣咸
畏嵩甚于陛下此竊君上之大權罪二善則稱君過
則歸己人臣忠君之道也今陛下有一善嵩必令子
播衆以爲成之自我又刊刻聖諭奏記欲使天下後

世謂陛下之善盡出于彼而後已。此掩君上之治功罪三。陛下命嵩擬旨。嵩命子世蕃約義子趙文華等會署之。屢更數手。機密漏泄。卽沈鍊劾嵩之疏。世蕃猶與文華擬旨送入。餘可知矣。此縱奸子之僭竊罪四。嵩欲其孫冒邊功。先以外姪歐陽必進總督兩廣。廼家平江伯陳圭爲總兵。鄉人御史黃如桂爲巡按。朋奸比周。妄奏長孫嚴效忠。有奏捷功。旨授錦衣鎮撫。又冊報效忠。獨斬瓊州寇七級。令次孫嚴鵠襲替。併功陞授錦衣千戶。乃以必進爲工部尚書。圭管後府。如桂遷太僕少卿。此備旣作。倣尤成風。蔣應奎等令子冒功。杖歛謫戍。皆嵩有以倡之也。此冒朝廷之軍功罪五。逆鸞總兵甘

肅以貪虐論革。世蕃乃受鸞金三千。授指兵部。薦爲大將。及鸞冒哈舟兒軍功。世蕃父子亦藉以陞廕。後知陛下疑鸞。始相排謗。以掩初跡。此引背逆之奸臣。罪六。前虜犯內地。尚書丁汝襲問計于嵩。嵩教以勿戰。恐敗不可掩。及汝襲達治。求嵩居間。嵩曰無恐也。吾密疏保若矣。汝襲臨刑而後知爲嵩所紿。此悞國家之軍機。罪七。黜陟者人君之大權。非臣下所得私。郎中徐學詩以劾嵩奪官矣。及大計京官。嵩逼吏部併黜其兄中舍應豐。賴聖明察及留之。給事厲汝進亦以劾嵩謫爲典史矣。及大計外官。復逼吏部將汝進削籍。則中外諸臣被其中傷者何可勝數。此專黜陟之大柄。罪八。嵩既專

擅則吏兵二部之權。尤所專主。文武之遷除。唯以賄之多寡爲低昂。故將官多朘削乎士卒。而行伍失所有司。皆剋剝乎下民。而百姓流離。怨恨載道。人人思亂。俱欲啖嵩之肉。此失天下之人心。罪九。嵩譎諛以欺上。貪污以率下。一人貪戾。天下成風。以守法紀爲固滯。巧彌縫爲膚敘。厲廉介爲矯激。善奔走爲練達。卑污阿附。牢不可破。此壞天下之風俗。罪十。嵩有十大罪。而陛下不知者。以有五奸爲之地耳。結納陛下之左右侍從。一言一動。無不關白。凡聖意之愛憎舉措。嵩皆預知。而遂其逢迎之巧。是陛下之左右。皆賊嵩之間諜。其奸一也。以趙文華爲通政使。凡疏到。必送副封。與嵩先閱。

而後進稍有干涉。卽爲彌縫。御史王宗茂劾嵩之疏文。華停留五日而後上。故嵩得以輾轉撝拾之。是陛下之納言。皆賊嵩之鷹犬。其奸二也。嵩畏緹騎之輯聞。令子世蕃結姻緹帥。以遂其掩飾之計。是陛下之牙爪。皆賊嵩之爪葛。其奸三也。嵩又畏臺諫之彈糾。故于進士初選。非出自門下者。不得爲中書行人。其推官知縣。非通賄。不得與徵取。而選擇之時。復取熟軟圓融者。以補臺諫之列。已而登拜。則留飲差發。則餞遺。所有愛憎。則授意論列。而緘默無建白者。五六載。則擢置華顯。故諸臺諫寧負陛下。而不忍忤權臣。是陛下之耳目。皆賊嵩之奴僕。其奸四也。嵩又懼部臣如徐學詩者。猶

得以議吾之後乃令子世蕃羅其有材望者結納之。其有怨望者斥逐之。連絡倚附。合爲一黨。是陛下之臣工皆賊嵩之心腹。其奸五也。嵩之十罪。賴五奸以掩覆。五奸一破。十罪立見。陛下聽臣之言。察嵩之奸。或召問二王。令其面陳嵩惡。或詢諸閣臣。諭以勿畏嵩威重。則置之憲典。以正國法。輕則論令致仕。以全國體。賊臣旣去。豪傑必出。雖繫俺答之頸。臣敢許其易耳。疏入。帝大怒。命繫錦衣獄。詰問何自引。二王繼盛曰。非二王誰不憚嵩者。且二王家事。寧不慮爲嵩敗耶。錦衣衛上其語。命杖一百。血肉公起。乃下刑部擬罪。尚書何鰲受嵩指。論繼盛詐傳親王令旨。律絞。郎

中史朝賓持不可。嵩聞之，謫史外任。侍郎王學益贊鰲具其獄，尋遷一級。

二月，改王忬巡撫浙江及福興漳泉地方。

忬以巡視權輕，不足督率吏士，請改勅文及印記從之。乃改巡視爲巡撫。

加都督陸炳少傅，兼太子太傅。支伯爵俸。

兵部尚書聶豹上言：都督炳潛奪逆鸞之氣，計安社稷，功在國家，與尋常勞動不同，宜待以殊典，以酬微功。帝從之，乃加少傅。支伯爵俸。眷遇益隆。

逮繫兵部郎中周冕于詔獄。

初，楊繼盛劾嵩父子，言及歐陽必進竄效忠名，冒功濫

擢事。必進上疏強辯。自云欲白心迹。下兵部查覈奏聞。世蕃自爲題草。遣人遺武選司郎中周冕。欲冕依草奏覆。冕乃上言。嚴嵩心事。兩京臺諫諸臣言之已盡。臣不敢再瀆。聖聽。臣職司武職功次。聞見頗真。謹卽冒濫軍功一事。爲陛下陳之。按二十七年十月。據通政司狀送。嚴效忠年十有六。考會武舉不第。志欲報效。本部咨送兩廣聽用。次年據兩廣總兵平江伯陳圭及御史歐陽必進題。瓊州黎寇平。遣效忠奏捷。卽援故事。授錦衣衛所鎮撫。亡何。嚴鵠言效忠病廢。鵠以親弟。應襲。又言效忠前斬賊首七級。例宜加陞二級。遂授千戶。臣于昔日問效忠爲誰。曰嵩之廝役也。鵠爲誰。曰世蕃之子。

也。憤懣不平。久之。不意嵩之表率百僚。顯爲家謀。敢同市井之行。壞朝廷之法。一至于此。今蒙明旨。下本部查覈。世蕃猶私創覆草。架構虛詞。遺臣欲臣依草題覆。欺罔之罪。可容誅哉。天地鬼神。照臨在上。其草見存。可爲左據。臣竊思祖宗之法。萬世不易。未見宰輔子孫。送軍門報效者。有之。自嵩始。蔣應奎。唐國相。以卿貳倣尤。俱蒙追論。而嵩乃不究。誰禁乎。伏望聖明察臣犬馬之心。特賜究正。使內外臣工。知有不可犯之法。臣雖隕首。亦無恨矣。疏入。帝以冕爲挾私。命逮治之。

三月王忬督兵破倭寇于普陀諸山。

初王忬廉知叅將俞大猷湯克寬材勇虛已任之有都

指揮盧鏜坐前都御史朱統事。尹鳳坐贓累俱繫獄。忬請知其能奏釋之以爲別將。募沿海壯民及徵狼土兵分帥之。日犒撫激厲。欲得其死力。而倭魁王直等結砦海中普陀諸山。顧時出近洋襲我軍。忬偵知之。乃夜遣俞大猷帥銳兵先發。而湯克寬以巨艘繼之。徑趨倭砦。縱火焚其廬舍。賊倉惶覓餘艘走。我兵隨擊大破之。斬首一百五十餘級。獲生倭一百四十三人。焚溺死者無筭。忽颶風發。兵亂。巨魁王直率衆乘間逸去。都指揮尹鳳復以閩兵邀擊于表頭北。焚諸洋。斬首百餘級。奪生倭二百餘人。先後以捷聞。賜白金文綺有差。

策士奉天殿

賜陳謹等四百三人及第出身。

閏三月虜寇大同塞副總兵郭都禦虜歿之。

虜寇大同之深井堡郭都歿事聞帝命卹典視張達

例予之巡撫都御史侯鉞削籍爲民。

城京師南郭。

虜寇延綏塞副總兵劉梅禦虜歿之。

套虜侵延綏塞攻圍城堡劉梅督兵出戰力屈歿之事

聞帝命卹典如張達例。

夏四月倭寇掠溫台寧紹蘇松諸處。

時諸倭巢穴旣燬王直毛海等奔散四去倏忽千里于

是溫台寧紹諸處俱罹其患叅將湯克寬帥兵往來海

堽護城堡捕奔軼斬獲亦相當有蕭顯者尤桀狡率勁
倭四百餘屠上海之南匯川沙逼松江而軍餘衆圍嘉
定太倉劫殺焚污慘不可言已而王忬遣都指揮盧鏜
倍道掩擊斬蕭顯餘衆復奔入浙俞六猷等邀殺殆盡
事聞復賜白金文綺有差先是吳淞間人習爲巽軟賊
未至望風奔潰而文武大吏不能以軍法繩下乃有司
黠者類以軍法挾喝富人巧索橫歛類多乾沒廉慎者
又以吳淞善諂俛首縮足不敢動一錢激賞是以公私
坐困戰守無策寇來敢亂不支遂至破昌國臨山鄞甯
乍浦青村柘林吳松江諸衛所圍海鹽平湖餘姚海寧
上海諸州縣忬不肯隱敗冒功有所陷沒隨而擊走之

計倭所得亦不足償夫前後俘斬總三千餘級吳浙賴之。

革呂平易州經略大臣

革屯牧管田鹽法都御史

先是科道建議增置屯牧管田鹽法三都御史乃以王達整理屯牧王璣招撫管田王甲清理鹽法至是御史霍冀上言屯牧宜責之山西等處巡撫管田宜責之鳳陽山東巡撫鹽法宜責之巡鹽御史庶幾省費寬民云下吏部覆議從之王達等各還里聽用帝曰天下大政屬之六部言官意見或有異同部臣當執可否以爲行止如何輒便題覆以致方行遽改甚非國體頗事依

達全無定執姑宥不究王達等俱准裁革仍行巡按御史勘覈各官有無成效具奏

山東盜李之強肆掠邳州諸處平之

李之強嘯聚千餘人建旗鼓殺掠居民流劫邳州諸郡邑巡撫山東都御史沈應龍總督漕運都御史連鑣匿不以聞巡按北畿御史李逢時上其狀帝怒切責應龍鑣令其戴罪剿寇久之乃平

錄巡撫宣府都御史劉璽上言修築邊垣須用灰甃以圖永久山西一鎮用銀六十五萬九千六百餘兩有前歲秋防支餘銀四十四萬二千七百兩外請給發御史秦朴亦言土砂易圯費當不貲俱下兵部議尚書

以言奏乞之數六十餘萬。則經營之限必十餘年。內帑
匱乏。難以議發。况曠日持久。無救目前。可姑爲旦夕防
禦之計。日後別圖末世之利。從之。

秋八月。河南盜師尚詔入歸德府。及柘城縣。

初柘城人師尚詔爲司市老人。陰蓄異志。歸德府知府
尹一仁不察其奸。信用之。檄使緝捕奸盜。尚詔有所藉
益。橫廣納諸不逞。謀爲不軌。至是要結數百千人。尅日
舉兵。適府中遣二邏卒至所居鎮落追攝。他有罪者尚
詔黨見之。疑來偵已。曰。尚詔執之。昇二卒至關。候伺斬
首以祭。遂率衆馳薄府城。夜及城下。府衛官知變。倉卒
棄城而奔。黨先布爲中訶者已開門納之矣。先是賊令

其黨勿犯學宮。勿戮辱生儒。以故城破。府縣官及其私人多避匿學宮。得不懼患。一檢校倉皇走。執而殺之。仍劫獄囚。掠帑藏。捆載出城去。初尚詔未叛時。剽奪傍近富人。家已巨萬金。買一娼家女爲姬。至舉兵薄府城。委其家不復備。念無有犯我者。而柘城人某素狡譎。計尚詔出。即率俠客數十人掠其家。傾所蓄金資。淫其娼姬而去。尚詔歸聞故。大恚恨。詢姬其由。姬頗識某舉。以對尚詔。遂率衆圍柘城。索其人。縣官不即予。守又無策。城遂破。搜其人支解之。大掠公私庾藏而去。復圍太康縣。亦索所素仇一二人。署事楊通判者懼不能守。執其人縋城予之。殺之乃去。時巡撫都御史楊宜徵兵追捕。爲

所敗官兵死者數百人。勢益猖獗。脅從日衆。殆至數千萬人矣。

冬十月河南盜平。

尚詔流劫兩月。所經睢州。西華。扶溝。鄆陵。許州。臨潁。諸州縣。殺人數千。拒敗官兵數次。至韭園。乃敗其黨散去。尚詔變姓名。走山東。爲官兵所尾盤詰獲之。河南方寧。虜薄古北口。總督侍郎楊博拒却之。

虜衆二十萬。薄烽火通于京師。帝懲庚戌事。憂日旰忘食。遣使偵諸軍戰守狀。時總督薊遼兵部左侍郎楊博躬擐甲乘城督諸將士防禦甚力。虜百道攻塞垣。博隨方拒擊。終不能入。使者以狀聞。帝大悅。即軍中賜

博衣一襲。發帑銀一萬兩犒其將士。博承命宣朝廷威德。諸將士人人喜。勇氣益倍。與虜守八日。虜不得利。乃引退。猶徘徊數舍外。不即去。博募敢死卒。持大械。夜數入其營擾之。虜竟宵不得息。倉皇遁去。事聞。帝大悅。進博右都御史兼侍郎。任一子錦衣千戶。博受知帝深。以此功也。

復以李默爲吏部尚書。

萬鏜以太子少保削籍爲民。乃復起默加太子少保兼翰林院學士。

甲寅。嘉靖三十有三年。春三月。倭寇掠揚州諸處。倭寇大掠通州。如臯。海門諸州縣。

夏四月

秋七月虜入大同塞逮繫總督宣大兵部尚書蘇祐及巡撫都御史齊宗道于詔獄。

時虜衆數萬入大同塞總兵官某帥師出禦力屈死全師覆沒事聞帝大怒逮繫撫臣齊宗道下詔獄勅蘇祐致仕已而復逮祐下獄削籍爲民宗道得減免別用以王忬爲右副都御史巡撫大同。

齊宗道被逮帝問高可燾同者高倉卒不知所對。

帝曰朕知王忬可乃手勅吏部曰朕思大同撫臣須得人乃可其以王忬爲右副都御史巡撫其地趣令之任忬在浙江薦盧鏜釋柯喬激厲諸將鄧城劉堂孫敖

夏光等爭奮逐北或以死緩著節復廣爲偵刺凡沿海大猾稱倭內主者悉繫按覆其家破解黨與自是倭奴不復知我虛實與所從嚮往而餘艘在海中者亦無以救粟火藥通矣往往食盡自遁散又行視諸郡邑未城者計寇所由緩急次第城之凡三十餘所杭州官吏以烽火不時發日集坊民登陴守夙夜怨苦忬令罷之曰吾斥堠明無慮弗及奈何先敵而逆受困敝耶一郡大喜至是往撫大同以徐州兵備副使李天寵爲僉都御史代忬忬去而浙中之禍始慘矣先是忬奏薦盧鏜爲叅將鎮閩閩人故忌鏜劾鏜兇險不可用罷之而沿海大猾且言忬令大猷搗巢非計欲搖動忬忬不爲動已

而南京各官復薦鏜乃復用鏜爲叅將而以俞大猷爲
浙直總兵將帥稱得人云

八月進李本文淵閣大學士徐階武英殿大學士

附錄初文華爲主事不檢左出爲州判官貢緣嵩復入爲郎
亡何改通政叅議尋擢通政使日與嵩子世蕃比周翊
嵩目爲義子鄖陽巡撫缺人嵩順指九卿會舉文華給
事中朱伯辰上疏數其不可且曰馮聲援而賂寵日張
恣貪饕而廉耻盡喪鄉黨羞稱縉紳共鄙聞散猶玷班
行臺憲何堪任使疏入不報不二年入爲工部侍郎至
是上言倭寇猖獗請禱祀東海以禳其魄帝從之乃
遣文華往祀因令督察沿海軍務文華至浙凌轢官吏

摻括財物。公私告擾。益無寧日矣。

虜入馬蘭峪。

虜以萬騎寇馬蘭峪。總督右都御史楊博檄總兵周益昌擊走之。

十有二月。虜寇大同塞。

總督侍郎許論巡撫都御史王忬徵兵擊走之。捕首虜百餘級。馬牛稱是。進忬兵部右侍郎兼右僉都御史。仍巡撫大同。許論及諸將士賜予有差。

乙卯。嘉靖三十有四年。春正月。以南京兵部尚書張經總督浙福南畿軍務。

時朝議欲徵狼土兵剿倭寇。以經嘗總督兩廣。有威惠。

爲狼土兵所戴服。故用之。勅令節制當天下半。得以便宜從事。開府置幕。自辟置諸叅佐。經亦慷慨自負許。中外忻忻。謂島寇不足平矣。

三月。以楊溥爲兵部尚書。

夏四月。張經大破倭寇于王江涇。逮繫張經及巡撫都御史李天寵于詔獄。俱論死。

初。經至浙中。有府同知張任者。先爲郎。嗤經。經銜之。經行部至其府。夜令人踰城出。質明。詰責任司兵防。不嚴。城守。褫衣冠。縛而箠之。藩臬府官。俱不敢一營解。得監織內臣馳入止之。任囚首裸跣出。不勝辱。欲自絞。死。其知府夜伴之。乃免。國朝府丞貳無受笞者。遠近駭異。

人心稍不予經其所用諸將佐何鄭沈希儀輩名位已抗驕不爲用而新拔士又慄猾不任兵所徵田州兵尾氏山東鎗手又不受律以故連戰敗衄名實頓損時侍郎趙文華挾嵩敵願指凌經經自以大臣儼然其上不爲屈文華恚連疏劾經謂其材足辦平賊第以家在閩避賊仇故趨起縱舍賊耳會臺諫亦有言者帝大怒遣官校逮捕經未至經已大集兵破倭于嘉興王江涇斬首二千餘級被溺死者稱是事聞兵科奏乞留經自效平餘倭不聽併李天寵俱逮至京下獄考訊論以縱寇罪必文華復奏以巡按御史胡宗憲爲僉都御史代天寵巡撫而以南京戶部侍郎楊宜代經總督

倭寇常熟江陰諸處知縣王秩錢淳禦寇死之。

時倭寇蘇常諸縣常熟知縣王秩江陰知縣錢淳各督士民出禦倭衆寡不敵力屈被殺事聞各加贈卹。

虜寇古北喜峰諸口

先是忬撫大同方半歲而薊遼總督楊博入爲本兵廷舉忬爲貳帝手署用忬進左侍郎兼右副都御史代博總督忬至薊無幾何虜酋打來孫黃台吉擁衆數萬薄古北喜峰諸口忬即徵兵拒走之因大集將佐計戰守諸利害已而條上八事曰列戍守聽權駐據險要專責成明偵報張兵聲恤主兵撫屬夷俱報可忬乃以副總兵吳佩遼東總兵殷尚質薊遼總兵周益昌副總兵

龔業及總兵趙卿李賢等各統騎步諸兵分守冷口馬
蘭峪牆子石塘嶺及淳海子紫荆倒馬諸關隘而自以
精兵居中應援又約宣大總督許論各移兵就險勿分
彼我界所以爲防禦計者殆無不至初朵顏福餘泰寧
三衛屬夷爲我外臣然徃徃爲虜用迫之則與虜一厚
遇之益驕縱挾虜恫喝我久無良畫忤熟計其便令鎮
巡諸官其以綺繒胡粉之屬結其妻孥撫慰備至又約
薊遼各總兵官以六月耀武其地旌旄經百餘里鼓鉦
不絕三衛夷稍惕厲復爲我用矣

九月虜寇懷來。

虜酋把都兒打來孫等悉衆屯懷來川攻南塘兒牆黑

衝峪大石溝諸處總督王忬督兵拒擊復走之事聞進
忬右都御史兼兵部左侍郎任一子千戶并錄宣大功
許論加太子太保餘有差

十月殺巡撫李天寵總督張經妻兵部員外楊繼盛于西
市

初繼盛獄具至冬月朝審諸內臣來道擁視因共指曰
此天下義士又指其三木竊歎曰奈何不以此囊嵩也
每歲覆奏帝意惜之至是復朝審部臣將繼盛與張
經同疏覆奏帝下旨行刑繼盛妻張氏上言願代夫
死不報遂以是月一日死于西市天下冤之論曰此
國家殺諍臣之始前此而恩而爵而東輦猶得保首領

徃犴間。或投戍遠裔也。後則允繩希顏俱肆市。而鍊亦羅織不免矣。分宜之惡極哉。夫三尺用以平庶獄。而召問二王一語。何關令旨。以是抵法。亡論臯繇泚類。即張杜羅吉見之。當亦搔首咋舌走矣。當時理官豈豺豕者耶。而自廁隸于權姦若是。噫。亦甚矣哉。使有如王儀封理馮侍御者。則忠愍亦必得投遐待雪矣。而何至長吟就經也。嗟嗟言之徒爲於邑。

十有一月。虜入遼東。大掠義州諸處。

打來孫等擁衆入遼東塞。殺掠義州等處居民。總督王忬復拒擊走之。巡按御史上言。地方被戮。宜將總兵官殷尚質究懲。巡撫都御史蘇志皋罷免。王忬切責章下。

兵部楊博覆奏尚質等力能卻虜情有可原。帝從之。置不問。

止徵狼土禦倭。

初徵狼土諸兵剿禦倭寇已而土兵瓦氏等至浙驕悍不就約束所過殘掠居民百姓苦之迄無戰功可錄于是總督楊宜上言徵調狼兵非徒無益而肆意騷動殘害元元不可。帝從之。命兩廣督臣查果遣發隨路掣止。

附錄右都御史朱希孝奏言錦衣千戶嚴鵬執獲虜謀哈台白馬廝二人左都督陸炳奏言官校戴經李恩執獲虜謀波羅花兔羊羔兒三人皆我華人易名爲虜用

者。下兵部覆議。帝命希孝炳各任一子錦衣百戶。嚴鵠等照例陞級。鵠嵩孫經恩炳私人也。

閏十一月。別防倭諸臣職守。

給事中孫濬上言。防倭諸臣既有巡撫總兵。又有總督。及都察重臣。事權不一。牽制靡定。所以迄無成功。兵部覆奏諸臣職守。督察主竭忠討寇。實覈布聞。總督主徵集官兵。指授方略。巡撫主督理軍務。措置糧餉。總兵主設法教練。身親戰陳。至于有司。責在保安地方。固守城隍。帝然之。命行諸臣各遵勅諭施行。論曰。十年九牧。自古患之。蓋不啻所牧騷繹。而牧者競以意見相軋。事權相撓。利病勞逸相妬傾矣。若之何盡牧之利耶。方倭

禍方萌時。一統足以剪其滋。及其既熾。一忤足以遏其衝。而何庸乎總督。又矧督察耶。統久而藩籬大撤。忤去而鷙猛頓解。經來而天寵之任不專。文華至而經禍立構。且併天寵而屠僂之矣。尚何冠之能平乎。孫濟之疏。深爲有見。惜不洞言其極。而使本兵大臣。徒紛紛于職守之區別也。

十有二月。逮繫給事中楊允繩。詔獄。考訊論死。

初。允繩巡視光祿錢穀。劾寺丞胡膏。混報子鵞。乾沒帑金。膏亦上疏辯。訐謂允繩訕。上齎祀康賈。駕言劾臣。苟有臣子之心。安敢如是。皇上爲國爲民。精誠格天。而臣有欺謗如允繩者。何可以爲百官勸也。臣一身不

足惜如朝廷大體何帝大怒命繫允繩詔獄嚴刑
考訊已而付刑部論允繩誹君比罵父律絞仍廷杖八
十固禁之胡膺亦補外職

趙文華還京

先是文華攘王江涇之捷以爲已有又奏言督兵破倭
于周浦等處捷聞召之還京

秦晉地震山移

陝西地震山移數里平地圻裂水溢出西安鳳翔慶陽
諸府州縣城皆陷沒人民壓死者數十萬連震數月人
心惶恐夜露宿里間不敢近廬舍山西平陽河南河洛
諸郡縣皆連及之

丙辰嘉靖三十有五年春正月逮繫李默于詔獄以趙文華爲工部尚書加太子太保。

默復入吏部給事中梁孟龍劾其剛褊貪污以名器爲網利之媒不宜久縱以傷國體默上疏辯訐帝兩舍之不問至是默復與趙文華構隙文華抗疏劾之初默與嵩異嵩銜之文華心知嵩指故有是劾疏入嵩中主之下旨收繫詔獄考訊竟死獄中嵩德文華故擢爲工部尚書。

二月以大學士李本攝吏部事。

本攝吏部上言欲第九卿長貳及寺院督撫諸大臣材品上請去留帝然之本乃疏諸臣百十有三人別爲

三等。其上二十有八人。首工部尚書吳鵬。次趙文華。嚴世蕃。陸燾。馮天馥。何鰲。沈坤。諸人。其中七十人。則鄢懋卿。徐履祥。趙貞吉。諸人。其下十有五人。宜斥免。乃葛守禮。艾守淳。郭鋈。陳邦修等。多可大用者。時論非之。

三月。顯陵宮殿成。

首尾修營十有餘年。至是始訖。工董役諸官。擢賞有差。加李本少保。武英殿大學士。

策士奉天殿。

賜諸大綬等二百九十六人。及第出身。

夏四月。倭寇薄溫州。同知黃釗逆戰死之。

時寇犯溫城。釗馳檄出兵迎擊賊。戰敗被執。寇欲還釗。

索千金爲贖。劄罵賊不置。賊怒。磔殺之。事聞。贈浙藩叅議。廕一子太學生。仍爲祠春秋祀之。

倭寇薄崇德縣。遊擊將軍宗孔鎮撫侯槐、何衡、義官霍貫道逆戰于皂角林。俱死之。

倭衆數千。自乍浦入。欲犯杭州。時宗孔以數百卒守崇德。欲扼其衝。乃逆戰于皂角林。分左右翼夾擊之。獲首功七十餘級。力竭無援。大呼鎮撫侯槐等力戰俱陷陣。死事。聞。贈孔都督同知。廕一子世指揮僉事。槐、衡各晉二級。貫道贈光祿寺丞。任一子知印出身。

倭寇大掠福浙淮揚。常鎮諸處。

先是張經逮去。以胡宗憲爲兵部侍郎。代經總督。而趙

文華亦召還。宗憲當事。莫知所指。寇益熾。南自福清登
岫。散入內池。流劫溫台。淮揚常鎮諸府。殺掠焚燬慘不
勝言矣。

以吳鵬爲吏部尚書。
以許論爲兵部尚書。

時楊博以父喪去位。乃以論代博。而用侍郎江東代論
總督。

附錄總督胡宗憲。奏遣生員蔣洲。胡可願使倭砦。傳諭
夷酋。令無犯順從之。已而可願等還言。夷酋欲通貢市。
宗憲以聞。下兵部集議。不可。乃止。

五月。大徵夷夏諸兵。協剿倭寇。以工部尚書趙文華總督。

浙福南畿軍務

初倭寇日熾圍巡撫阮鶚于郡城巡按御史趙孔昭上疏乞援巡按御史邵惟忠亦上言倭寇薄通州攻圍未解餘衆自狼山轉掠瀕江諸郡縣而瓜儀爲留都門戶鎮常乃漕運咽喉不可視爲緩圖宜大集客兵嚴勅諸臣協心戮力共靖其亂下兵部覆題倭自入犯以來未有徧浙之東西江之南比如今日者縱使地方多兵而分投防禦不無顧此失彼之患徵兵應援寔不容已且者趙孔昭乞援已議令徵集湖廣土舍永順夷兵併山東河南廣東打手胡廬等兵共六枝俱赴浙直軍門聽用今再議選河南睢陳及山東八衛兵陝西延綏兵徐

沛募兵。勅遣才望大臣一人總督前去。以爲犄角保障。留都。帝然之。文華請行。乃命兼右副都御史總督浙福直隸軍務。

六月倭寇入慈谿縣。知縣柳東伯亡去。

初王忬在浙。計城各邑未城者。慈谿士人獨持不可。至是倭衆大至。知縣柳東伯不知所禦。攜印組走匿。殘殺民人無算。其縉紳被禍尤慘。皆追悔不城爲失計矣。東伯失守當坐死。以無城隍可守。削籍爲民。

倭寇薄海鹽縣。指揮徐行健程祿百戶方存仁逆戰死之。事聞。

行健贈指揮使。任一子百戶。祿存仁各贈卹有差。

九月。廢徽王載堉爲庶人。自殺。

王國開封之均州。初恭王噉其知州某衡命。執而箠之。知州死。巡按御史劾王大不敬。帝謂御史庇其部官。逮御史詣京。廷杖之。及王即位。益橫。謂帝庇我。日嗾護衛卒。按羅士民有美田園及木石異者。輒謂爲國中固有。沒入之。民間女子稍端麗者。俱強昇入府爲宮婢。不可則以予衛卒。其宮婢小有青。輒箠死。昇尸焚之。或生啖虎豹。或生錮棺中。燎焚死。痛哀聲徹道。行者不忍聞。又庇其伶人。使凌轢縉紳士。道遇伶人。輒辟易。不則必遭唾謔。或有被桮榆者。間以白王。王仍伸伶人。不爲問。又架飛覘數百丈。自北城女牆上連府中後苑。命伶

人爲械。激潁水入相。輸後苑沼池內。其規柱所植處。亡論士民第舍。即發屋。豎之。不可。即遭朴。或沒其地。州士民皆重足立。搥手屏息。恐觸忌。破家矣。先是王好方術。士煉女癸爲鉛服之。云能延算。有梁散人者。以羽客出入王門下。知帝好方術。乃竊王鉛走京師。貢綠獻帝。帝服之喜。復索鉛。散人不能繼。貽書求王。王謂吾鉛當自獻。何爲假彼市寵也。乃不與。散人銜之。而王好微行。嘗從其食客之。留都及鳳陽。遊數月。乃還。一日帝從容問散人。爾游微邸。知其王何似。散人前卻奏曰。日者猶未諳事。自之留都還。則大曉暢。帝愕然。自是疑王。而州民耿安者。有女在王宮中。以過箠死。毀其屍。

安慟女非命。走京師。上變告王謀不軌。且指其潛窺
留都鳳陽。睥睨非望。及諸罪狀。下河南撫按官勘覈不
妄。帝怒。命削王爵。廢爲庶人。禁錮鳳陽邸。于是巡撫
都御史潘恩。巡按某督衆圍王宮。欲徙之。王懼。命妃妾
四十人俱麗粧自經。王亦經死。貨貨俱沒入官。初王庭
鍾鼓自鳴。後苑見羣羊入沒。占者曰。當亡國。王不悛。乃
及。

八月。總兵官俞大猷大破倭寇于梁莊。

初趙文華赴浙。沿河徵檄。河間山東兵四千人。募徐沛
兵千人爲前鋒。已而抵鎮江。兵東下。諸寇懼。在常州桃
港諸處者。聞之皆解散。亡何。復聚掠。倏忽莫測。胡宗憲

計無所措。議欲招輯之。徐圖掩襲。巡按浙江御史趙孔昭巡按蘇松。御史周如斗不可。因上言。寇未一挫。撫之徒滋後患。宜命文華矢心協慮。務懷永圖。今徵兵四集。初氣正銳。當大張軍勢。明彰天討。期以滅寇安民。勿得輕信寡謀。自貽僇辱。帝然之。論文華協謀剿寇。尅期蕩平。文華仍與胡宗憲宣諭渠魁徐海等出降。而密檄總兵俞大猷整師大戰。徐海猶豫不決。率衆欲就撫。仍肆掠不止。俞大猷督師襲擊于沈莊。破之。又追擊于梁莊。賊大潰敗。斬獲一千六百餘級。徐海倉皇溺水死。引出截其首。生獲副魁麻葉陳東。徐洪及倭魁辛五郎。密之麻餘衆解散。地方稍寧。文華前後兩上捷音。襲爲已

功。帝命械繫首惡至京正法。已而兵部復奏首惡就擒。地方底定。皆皇上至誠昭格。玄功允洽。是以百靈助順。謀若啟而戰。若有翼。非區區人力所能強爲也。乞卜修祀。用答玄貺。趙文華等以次待覈實擢賞。帝從之。先降勅旌功。仍令文華還京。

九月。杭州火。

府城東南隅及郭外大火。官民廬舍焚燬數千區。死者甚衆。

虜寇喜峰口諸處。

虜酋小王子打來孫等寇一片石喜峰口諸處。總督王忬督兵拒走之。事聞。贈金綺有差。

趙文華還京

初文華再出督兵所至徵兵集餉浪費不經于是提編從役加徵稅租截留漕粟扣除京帑迫脇富民脫釋凶醜搜括公私金瑤圖國以百萬計其爲軍旅之用纔什之一二所徵官土民兵川湖廣貴山東西河南北無不罹患而臨敵不前遣還不去往往潛爲盜賊行者居者並受其禍雖有梁莊之捷人腹非之至是還京而吳越之間若脫距矣

冬十月馮岳平湖廣苗

初張岳旣卒諸苗廬阿項吳平張等復叛總督侍郎馮岳至檄總兵石邦憲復擊平之捷聞進岳右都御史兼

侍郎邦憲爲都督同知。餘擢賞有差。

十一月虜入遼塞。總兵官殷尚質遊擊將軍閻懋官禦虜死之。

虜衆十餘萬入寇鎮靜堡諸戍殷尚質等帥兵出禦力屈死之事聞贈卹有差。總督御史王忬奪俸三月。巡撫蘇志皋奪官二級。

賜大學士嵩免朝。仍腰輿入直。

帝謂元輔嵩年逾七袞。賜免廷賀。惟入直西苑。仍賜腰輿。先是賜得乘馬入禁。至是復加恩寵。爲異數云。

加趙文華少保。胡宗憲右都御史。各任一子。

論平倭功也。各任一子錦衣千戶。餘陞賞有差。

十有二月獻倭俘

趙文華至京。麻葉陳求等械繫亦至。禮兵二部奏請獻俘從之。羣臣俱具服稱賀。仍舉謝玄大典。

丁丑嘉靖三十有六年春二月致仕尚書朱希周卒。

三月倭寇掠寧波府。

初梁莊之捷徐海等敗死其渠魁王直復糾倭衆六艘約三千餘人入寧波府岑港登陸四掠焚戮慘甚總督胡宗憲方議招納按兵不擊參政劉燾屢請出師不聽虜入薊州塞掠灤河諸處副總兵蔣承勛禦虜死之

虜酋打來孫等擁衆十餘萬人薊州桃林口踰建昌營灤河掠永平諸邑蔣承勛率衆禦虜戰敗死之事聞贈

承勛都督。廕一子。正千戶。言官劾總兵歐陽安等。帝怒。奪王忬右都御史。止以右侍郎兼僉都御史視事。巡撫都御史張祉。謫爲大理丞。總兵歐陽安。奪都督。各仍舊視事。

夏四月丙申。奉天謹身華蓋及奉天午門災。

是日晡時。大雷雨至。戍不絕。忽火起奉天殿。及謹身華蓋二殿。奉天午門。一時俱災。次日羣臣各上疏慰問。帝命各加修省。

辛丑。有事于郊廟社稷。詔天下。

告災也。帝諭禮部。正朝係出治之地。上下同責。勿但朕罪。茲二十二日。舉祀高玄大典。止封停刑。百官依修。

省例五日乃止。

海寇王直就誅。

胡宗憲與王直俱蕪人。初直寇岑港。宗憲欲戰而慮不勝。乃力主撫議。檄總兵官盧剛往來直舟。爲盟甚堅。約直來。官以都督置司海上。通互市。直信之。亦自奮言能肅清海波。遂與毛海峰葉碧川挺身來見。宗憲以賓禮遇。使指揮爲其館主。給輿夫。有輿出入。復出薪米肉酒。供餽其舟人。日費百餘金。且交質爲信。保無他虞。宗憲以狀上。然不敢悉其故。大媿沮。然不獲已。密檄按察使收繫臬司。獄具。諭令少緩。恐急則激之去。然其實欲陰逸直。顧前盟也。而將歸責于按察司。按察司覺之。乃急

收直竟服上刑。宗憲復以爲己功。謂招納爲秘計。非本心也。朝廷信之。加憲太子太保。餘遷賞有差。然直雖就誅。而三千人無所歸。益恚恨。謂我不足信。撫之不復來矣。日散掠閩越淮揚。爲禍更慘。

秋八月。進徐階少傅。李本太子太傅。

虜入鴈門塞。

虜衆二十萬。破應州四十餘堡。攻鴈門關。巡撫都御史閔煦乞兵應援。總督楊順見以爲失律。當坐。乃總兵殺避虜兵民歸上首功。以自解。得不罷去。

冬十月。玄獄諸山獻紫芝千餘本。

先是。帝屢諭玄獄諸處採獻鮮芝。逾九月者勿上。至

是共獻到一千四百十本。已而巡按北圻御史馬思臧獻二十本。巡撫河南都御史潘恩獻二十有五本。布政使林懋和獻二十有二本。巡撫北圻御史路楷獻二十有一本。四方繼上者不勝計矣。鄆縣民亦獻一百八十有一本。賞以金幣。

楊順路楷殺前錦衣衛經歷沈鍊。

初鍊至保安州。里中人爭館穀之。使弟子從學。愛甚。父老問知其故。則相罵。嵩父子鍊亦大罵之。又東芻爲偶人三。目爲林甫。檜及嵩。而射之以泄忿。嵩父子聞之。益啣鍊。而前後總督多殺避虜人爲功。以掩敗。鍊復大怒。懣貽書讓之。已而侍郎楊順至。掩敗益甚。鍊讓之。語益

峻且爲詩及樂府以寄誚。順大恚恨。陰嗾經歷金紹魯。指揮羅鎧走白世蕃。謂鍊結客欲報嵩父子。世蕃以問御史李鳳毛。鳳毛曰有之。然予已解散其黨矣。尋遷鳳毛光祿卿。以路楷代鳳毛。世蕃又以鍊爲屬。楷至則與順共爲策。適有白社妖人通虜者。順急捕之。乃寘鍊名其中。以謀叛聞。下兵部議。尚書許論亦不爲雪理。議上。嵩擬旨殺之。藉其家。任順一子錦衣千戶。遷楷太常寺少卿。順以嵩償我薄。意其毒鍊未足也。復取鍊二子箠死。又取其嫡子生員襄。日考掠之。幾不免。乃順楷敗。乃脫。

重建奉天等殿。

初三殿二門災。帝諭禮工二部。先復朝門。餘次及之。文武大臣。捐俸助大工。於是唐王助金五千兩。榮王五千兩。晉王二千兩。各下璽書優獎。嚴嵩朱希忠陸炳各助金一千兩。李本徐階方承裕。詔許從誠等。各五百兩。餘官有差。至是。帝諭羣臣。皇天眷朕。新作明堂而治。以是月二十八日。建工。預奉告于玄極殿。及大高玄殿。百官吉服視事。法司停刑。

十一月。加故主事史際爲太僕少卿。任其一子。

際久居里中。以叅軍前謀議。平倭有功。胡宗憲上其狀。命進尚寶卿。已而加太僕少卿。間居里中。廕其子繼書爲錦衣百戶。

附錄給事中徐浦劾戶部尚書方鈍昏庸依附難司邦計。如言官奏胡宗憲阮鶚提編虐民。呂希周侵牟軍帑。皆事有指坐而鈍題覆。故爲兩可。以示調停。不堪重任。可知矣。疏入不報。雲南左布政鮑道明獻寶石一萬五千八百餘枚。巡撫四川都御史黃光昇獻礦砂五百斤。

十有二月。兗州地震。無雪。

帝命祈雪于雷殿諸祠。逾月雪降。羣臣表賀。

趙文華罷。

初文華自浙還。以金二萬兩。金絲床幄一具。饋世蕃。世

蕃姬妾二十有七人。各金翠髻粧一套。世蕃以爲薄已。啗之爲蔬草遺文華。使移病去。文華不得已。依其草上之。遂放歸。

戊午。嘉靖三十有七年。春正月。光祿火。

帝諭司禮監曰。寺火。非天災。自馬從謙以來。邪黨日多。故爾。

虜圍大同右衛。

虜衆數萬入大同塞。圍右衛攻之。不克。事聞。帝命戶部發帑金十萬兩。付大同督撫大同。選集兵馬。應援右衛。

附錄巡撫應天都御史趙忻獻芝二十四本。巡按御史

莫如士獻二十本。山東巡按段顧言獻二十七本。湖廣巡按黃季瑞獻四十六本。河南巡按楊惟平獻二十五本。

三月。河南地震有聲。

逮繫楊順路楷于詔獄。尚書許論削籍。起楊溥代之。

初虜寇中有逃婦桃松債來歸。總督楊順納之上。其狀以爲功。已而俺答索桃松債急。順急。上言虜情叵測。欲脅朝廷歸之。未及決。俺答子黃台吉黠虜也。詐言以我叛人丘富易桃松債。順信其言。以松債予之。而丘富竟不得順懼罪。賂巡按御史路楷。楷納賂。隱其事。給事中吳時來聞之。乃上疏劾順楷。謂順先後請兵餉六十餘

萬而寇至輒稱無兵。如桃松債未降。此不過虜中一亡婦耳。苟明于啟釁之媒。拒之而弗納可也。何乃貪爲已功。以誇示京師。及聞虜酋來索。又張皇敵勢。恫喝朝廷。故爲兩難之說。以自解。已而輕墮虜計。以丘富易而丘富卒不得。不知順何以自解也。乃行七千金。賂御史楷。楷遂箝口隱蔽其事。然則朝廷餉邊之用。祇供順等保身潤家之需耳。兵部尚書許論。虛名自負。大言不慚。與順比周隱蔽。心實不忠。宜各明正其罪。以爲人臣罔上之戒。帝怒。命遣官校逮繫順楷詣京。下錦衣獄。已而削籍爲民。許論亦奪官放歸田里。方銳改南京用。逮繫都御史阮鶚詣京。

先是御史宋儀望上言。過年舉用邊臣。率以奔競爲通
敏。僂譎爲揮霍。不一二歲。輒計遷擢。每有敗衄。巧爲蔽
覆。甚則求歸。輒載而去矣。如何棟之在薊遼。周璠之在
蘇松。是已。今醜虜盤據內地。任其出沒。主客之勢。久已
倒置。而文武大臣。動多失策。欺誤之罪。恐不止一楊順
也。巡撫福建都御史阮鶚。久徵客兵。荼養民間。驕恣姦
淫。無復紀律。百姓被害。不可勝言。至爲十恨之謠。而鶚
日集金工。鍛鑄卮壘。以爲問遺之資。動輒提編徭賦。恬
不顧忌。臣謂胡宗憲與鶚。均肆餐饕。而鶚爲尤甚。即不
止于罷斥也。章下兵部。給事中劉祐。亦上言劾鶚。謂其
側目黃緣。剝民聚怨。莫不欲啖其肉。而寢處其皮。帝

怒。命遣官校逮繫來京。下鎮撫司考訊。

逮繫侍郎吳嘉會于詔獄考訊。

御史萬民英劾嘉會巡撫薊州時。侵牟築塞帑金。時嘉會爲兵部侍郎攝部事。帝命收繫詔獄。以工部尚書鄭曉代攝。已而獄具。削籍爲民。

逮繫給事中吳時來。主事張翀。董傳策于詔獄。

給事中吳時來。上疏劾嵩輔政二十年。引用匪人。遷事日非。令其子世蕃入直。干與國政。窺覘幾微。以市私恩。引其親萬寀爲文選郎中。方祥爲職方郎中。比周爲姦。賄賂公行。進退一人。行止一事。必關白世蕃而後可。復不論人之賢否。事之是非。唯視所入之多寡而已。如趙

文華勦倭還京饋遺數萬猶以爲未足而授草引疾張
經被逮行金五千及其不免而爲治裝賻饋王汝孝失
律以三千金而得遣戍蔡克廉撫淮陽亦以三千金而
轉地卿楊順欺君誤國何以可錄而三廕其子計前
後行金三萬而方祥亦得二千吳嘉會修邊侵冒亦何
功可錄而驟遷三官後復三廕其子蓋饋銀卮彛五篋
而趙文華爲之關通故今邊事之不振由于軍民之困
窮軍民之困窮由于上官之貪縱上官之貪縱由于謀
國之無人拔本塞源之喻願皇上察之主事卿亦上
言劾嵩位極人臣貲甲天下錄其子至工部侍郎孫至
錦衣中書賓客盡登顯要親戚俱衣青紫古今以來可

調極遇矣。報恩當何如。而乃恣行貪險。大壞紀綱。邊情之所以急。儲餉之所以乏。人才之所以下。皆嵩所致。且其險足以傾人。其詐足以惑世。其辯足以亂政。其才足以濟惡。使天下之人。深畏其威。而不敢言。不可不急處。以謝天下。主事董傳策亦上言劾嵩。姦貪諸狀。急當罷斥。以收人心。帝怒。俱逮繫鎮撫獄。已而廷杖謫發嶺南戍邊。但有亡歸者。處以重刑。

夏四月。倭寇掠臨海縣。

倭寇二十二艘。約數千人。掠臨海之三石鎮。總督胡宗憲驅走之。

楊傳出督宣大軍務。

初許論罷。帝思博忠勤。乃自服中起爲兵部尚書。旣而大同右衛圍久不解。議者以爲非博往不可。帝遂命博出督宣大軍務。虜部中位待之。

侍郎胡宗憲獻白鹿。

總督浙畿侍郎胡宗憲表獻白鹿。嵩等表賀。

密雲地震有聲。

總督侍郎王忬以聞。

附錄給事中張益劾巡撫遼東都御史蘇志皋貪污敗檢。帝命削籍爲民。帝諭戶部兵部大同右衛久困乏食。即舉督餉大臣一人領銀前往山西紫荆諸處糴米轉給。仍徵薊州等處兵馬赴援。戶部奏發帑金四十

萬兩赴大同支用從之。

大同右衛圍解。

初楊博承命出督宣大。徵諸鎮卒。聲言伐虜。羽檄日十數下。虜聞將至。乃引去。守將尚表與虜拒幾四閱月。誓志厲衆。死守不屈。博上其功。優叙之。王德戰歿。奏爲立祠贈廕。有叅將周現者。往來虜營。相結納。博列其狀。褫職。自是人人砥礪。思自奮矣。博因陳善後二十餘事。築牛心諸堡。爲烽堠二千八百餘所。濬濠千餘里。五月。訖工。帝大悅。加博太子太保。兼左都御史。

五月大雩乃雨。

時久旱。禾欲立稿。帝命齋祀高玄。忽雷電交至。澍雨。

需足。羣臣表賀。

初除進士于遼縣。

從楊博請也。

蒲州潮州各地震。

東陽縣地出血。

浙江東陽縣湖城地圻泐四三處。各湧血若綫。疑結片起。巡按御史主本固。總督侍郎胡宗憲各上其狀。因言往歲慈谿曾有此異。未幾有海寇之殃。今諸寇未息。而東陽復爾。可爲寒心。乞勅大小臣工一體警備。從之。

六月遼東大水。

秋七月河南南陽地震。

閏七月淳化諸縣雨雹。

虜寇延綏。

西苑上嘉禾五本。帝命薦于太廟。羣臣表賀。

大朝門成。

時奉天門成。帝命改爲大朝門。羣臣表賀。

胡宗憲復獻白鹿。

以曾子裔孫質粹爲翰林世博士。

曾子五十九代孫。

九月。冊裕王妃陳氏。

妃生員陳景行女也。選爲裕王妃。冊之是爲仁聖。

皇太后。

虜寇遼東。

先是二月。六月。虜二次寇遼東。總督王忬檄故都督楊照破走之。錄忬一子入國學讀書。累賜金綺。至是大虜王。文士蠻黑石岩諸部十餘萬衆。駐大鹵塲。以精兵七千騎寇界嶺。坎垣將上。叅將崔桐擊走之。又寇箭桿嶺。總兵佟登拒之。又合衆寇嶺西諸塞。總兵歐陽安馬芳等擊走之。其奇兵入黑谷嶺。中軍張倫等破走之。乃拔營遁去。

冬十月。議練邊卒。

自庚戌後。虜患日迫。諸鎮兵不支。每歲徵客兵爲援。而客兵苦徵發。爲費復不貲。日就耗敝。當事者建議。各練

本鎮戍卒當減徵發什之六七。帝從之。勅各鎮遵守。然戍卒多巽懦不任戰。雖歲練費數萬金。而邊臣之徵發復如故也。

逮應天巡撫趙忻下詔獄。

裁光祿寺歲費。

己未嘉靖三十有八年春正月。總督侍郎王忬大破虜寇于遼東。

虜犯遼東。忬檄部將楊照帥師禦之。照布分諸將及虜大戰。逐北數千里。斬首虜八百二十四。及鹵馬牛夷器千計。忬以大捷聞。故事。首虜四百。即稱大捷爲上功。而嵩、訥、忬愍楊繼盛竟阨其功不錄。

二月虜入薊州塞。

自練兵議起薊鎮客兵減什之二。而春防視秋防又殺什之五。以故鎮兵最爲單弱。是時虜酋把都兒辛愛率數萬騎以朶顏酋影克哈孩爲鄉導入寇。忬所遣偵諜皆被殺死。遂薄塞下。忬疏請援兵。嵩謂忬挾虜爲重。欲坐費帑金不報。適滦水暴淺。虜遂由潘家口入塞。大掠薊州諸處。忬遣總兵馬芳等以輕兵八千夜馳虜後。牽引之。虜不敢深入。三日引去。忬兵尾而擊之。獲虜首數十級。

逮繫總兵官歐陽安等于詔獄。論死。

帝以薊州失律。逮安等下獄。而奪王忬祿俸。使砥礪爲

秋防計已而言官論安等當服重典乃論死長繫獄
三月策士奉天殿

賜丁士美等三百三十人及第出身

夏四月叛寇殺叅將高鵬及遊擊將軍畢文

山西叅將高鵬有廝養卒八百人控馭無術八百人等
遂謀叛殺鵬及其擊遊畢文焚府庫廬解劫囚掠帑一
郡大亂都指揮使鄭印督兵討之羣寇遁散

倭寇掠通州如阜松門諸處

巡撫都御史李遂督兵拒倭有廟灣之捷尋入爲南京
兵部侍郎

以唐順之爲右通政

初順之。父廢家居十餘年。從趙文華參畫破倭有功。起爲南京兵部車駕司主事。遷兵部職方司員外郎。遷郎中。至是以爲右通政。仍同胡宗憲經畫軍政。

五月倭寇掠福清晉江諸縣。

倭犯福清諸縣焚劫慘甚。巡按御史樊獻科劾巡撫都御史王詢參將黎鵬失律。奪祿抵罪有差。

逮繫侍郎王忬于詔獄。考訊論死。

初楊繼盛劾嵩爲所陷死。忬聞之悼甚。而其子世貞嘗從繼盛游。又爲經紀其喪。嵩銜之。常欲有以中忬。及職方郎中唐順之出覈薊卒。以粉榆故頗露嵩意。于忬要之謝。嵩忤唯唯。不欲以汗請順之還。奏薊鎮額卒減少。

三萬餘人。且云一卒未練。仍以徵發疲各邊。嵩擬旨。當重置罪。姑奪祿責後效。帝從之。初。忬實以鎮卒選。悞不任戰。雖練無益。而諸隘迫虜。不得不徵發。以爲固然。不敢辯。而䟽上練兵十三事。曰。請以三年爲期。嵩嘻曰。何苛略而今詳也。且渠尚欲三年耶。及灤河之役。嵩嗾言官劾總兵等官置之死。欲以誣忬。而都御史鄢懋卿復給忬曰。政府以邊事重。不欲困若。行且縱若歸矣。蓋自投劾去。忬信之。果請放歸。懋卿復爲草授御史方輅曰。政府欲逐王忬。而忬復自請歸。盍若劾忬。兩逐之。輅亦信懋卿。乃上言。忬病悸不任事。負主上恩。當罷。嵩得輅䟽。即擬旨逮繫忬。帝從之。乃遣官校械忬至京。

下錦衣獄考訊。爰書既具。世蕃復削去所叙功次上之。下刑部論罪。尚書鄭曉惜忤。持不從重。擬謫戍奏上。帝降旨曰。軍令指揮之誤。諸將皆斬。令從重擬。坐乃比守邊將帥。守備不設。失陷城寨。律斬。長繫待報。

六月。改楊博總督薊遼軍務。

初。博在宣大有酋李者。素雄塞外。屢肆侵擾。博計擒之。斬其黨十有五人。時出奇兵襲虜。虜徙帳去。乃列上修邊四事。費半功倍。帝嘉之。至是移督薊遼。時虜方盛。博聞命。即赴鎮。區畫戰守事宜。虜聞楊總督至。悉引去。博以朵顏等屬夷。每通虜。不爲我用。乃約諸帥。同時舉烽燧。楊旄纛。自居庸至山海。彌漫千餘里。旌幢連空。

礮石震山谷。如是者三。屬夷謀報虜。虜大震疊。以爲我兵頻增益。連瑕爲堅。天終歲不敢近塞下。

盧鏜破倭寇于崇明沙。

時倭寇二十餘艘屯崇明沙。胡宗憲檄副總兵盧鏜帥師攻破之。寇遁去。宗憲以捷聞。兼叙唐順之叅畫功。尋擢唐順之僉都御史。巡撫淮揚。未幾卒于官。

以陶世恩爲太常寺寺丞。

初世恩以廕歷尚寶少卿。爲言官所列。奪其官。仲文乞復子原職。帝命改爲太常寺寺丞。兼道錄司右演法。已而仲文請假還里中。帝諭禮部曰。仲文職掌玄教。屢盡忠誠。雖請假還鄉。年逾八旬。即書勅遣錦衣千戶

一人前去存問。仍賜白金百兩。綵繒八束。新鈔八千貫。羊四羴。酒四十瓶。以示眷懷。仍令有司歲時存問。

京師大霖雨。

帝令司禮監祈晴雷殿。禁屠停刑。

倭寇大掠福建諸處。

倭掠福建。猖獗日甚。巡按御史樊獻科。疏請總督胡宗憲督兵應援。帝命宗憲速往。逗遛不果。

秋七月。土虜番寇黑松林諸處。

冬十月。廣東叛寇流劫潮陽海豐諸處。

廣東寇張璉。林朝暉。吳平。龍阿福。溫旦等。雲合千餘人。流劫潮陽諸處。拒殺官兵。守土官不能制。以狀聞。

召兵部尚書楊博還京。起故兵部尚書許論總督薊遼軍務。

召博還部加少保。而以許論代督薊遼。

庚申嘉靖三十有九年春正月。

二月丁酉朔遣官祈穀于玄極殿。

歲每驚蟄行祈穀禮。自己亥後。帝不視朝。諸祀亦多

代攝。是月朔驚蟄遣官祈穀。

棄故中允郭希顏于市。傳首天下。

初希顏由中允出爲兩浙鹽運副。大計被除。家居者十餘年。至是乃上疏曰。臣往歲恭讀聖諭。欲建帝立儲者。臣謂立儲難。莫若安儲難。何者。君相相信則儲安。兄

弟相保則儲安。父子相體則儲安。相信有道。釋疑是也。相保有道。分封是也。相體有道。總攬是也。三者安儲之急務也。何謂釋疑。皇上至愛莫如二王。至重莫若元輔。固何嫌何疑。自言者倡爲二王陳嵩之說。臣恐輔臣疑而不自安。何暇善後。然尚可誘也。由差遠也。二王疑而不自安。誰與承祧。此大可慮也。由最近也。皇上盍諭元輔以益加忠謹。使知王初無他。也不必疑。疑王諭二王以毋忘恭敬。使知嵩終無他。也不必疑。嵩然後王心無所惶惑。而師保是依。大臣無所忌避。而匡贊愈力。臣故曰疑釋而君相相信。則儲可得而安也。何謂分封。二王親則皇上之子也。貴則國本之

寄也。顧同處

京府。智與年長。則崇高所共欲。防不預

設。則讒隙所由萌。故幼而暱。就膝下者。所以篤恩也。長而出就藩封者。所以強本也。官府不宜久虛。山川若已預待。及時勅王就國。周其羽衛。殊其寵數。於制於情。似爲兩盡。故曰分封而兄弟相保。則儲可得而安也。何謂總攬。恒情愛子者。未有不身任其艱。而欲子安于無事也。今四郊多壘。一日萬幾。非皇上神謨獨運。太平未可易致者。即京府獨處。猶宜親就儒賢。涵養冲質。而一毫外務。不得預聞。分封之典。旣定。而京之意已明。皇上端拱以順天人。從容而議建立。似無不可。故曰總攬而父子相體。則儲可得而安也。每歎忠臣不退耕而

忘君烈士不避僇以直諫在廷不言在野不容不言
惟聖明赦草茅言計自臣始則士豈有不嚮風刎首
爭效闕下者哉疏入帝覽之大怒謂建帝字爲妖言
嵩復擬旨從吏之遂比妖言律斬傳首海內於是旨
下江西撫按官秘之密檄守巡官收希顏而顏不之知
也時于家延賓客爲子娶婦衣緋待之有僉臬某亦衣
緋來通謁爲候希顏以爲賀已也迎之坐未及語胸左
右曳之出遂掖赴都指揮司縛繫之已而諸司漸至撫
按官亦至乃昇赴市曹斬之傳首天下知與不知莫不
哀焉

竹谿縣地震出血

南京衛卒亂殺督儲侍郎黃懋官

故事諸衛卒月廩折值頗豐諸有室者仍有口分米至是戶部議損折值五分之一懋官視事又革口分米止廩本卒其補伍復役諸卒每每駁覈經歲時不得受廩而諸受廩者小月又輒除三升不之予更嚴核死亡卒不實則榜其部長諸卒積怨之又故事每月發廩不逾上五日先期下關符待之是月旣望關符未下且議三月內止發半廩折值予之諸卒愈忿有孝陵衛卒周山錢用鮑惠李文升褚璠金嚴輔等首倡亂以十九日薄暮入城分布朝陽通濟門內及栢川橋諸要路至子夜諸衛卒欲赴營待練山等各遮留諸卒勿赴營俱隨我

至總督府。丐月廩。衆從之。遂走會同館。傍圍懋官居第。鼓譟不已。周山、鮑惠等首破關。擁入懋官倉。皇出白金四鎰遺山等。令其解散。諸亂卒聞之。併衆擁入懋官署。迫踰垣。欲自避匿。墮傷殆絕。其妻先亡。諸卒出其尸。掠其含歛。及諸橐裝而去。復索得懋官羣仆俱下。斃之。仍昇至大中橋。縛繫坊上。時新江口操卒聞城內亂。亦鼓譟擁入。四掠商民。復突入內廠。欲刺守備。不得。府部諸大臣聞之急。出示諭不聽。誠意伯劉世延諭之稍戢。仍不解散。乃議發賑。每卒予一金。令赴演武場受訖。乃去。已而都督徐某密檄捕周山、蔡忠、劉鑾、滕彪。謝學朱受兒等二十人。送刑部鞠訊。事聞。帝下旨曰。營卒集衆。

圍逼部臣。必有不得已者。何綬徐鵬舉李庭竹張鏊俱有守備責任。不能鈴械。俱應究治。姑令帶罪視事。與侍郎李遂撫輯軍民。凡事便宜處置。各營軍卒夙受朝廷惠養。輒不畏法。俱宜重處。爲首者查名禽治。其餘姑念激變所致。俱赦免。已而法司會問周山等二十人謀殺制使皆斬。餘從赦原奏入。帝謂黃懋官全尸而死。已爲失刑。所獲未必皆爲首者。再議奏聞。刑部復會擬周山蔡忠劉鑾倡亂斬首。滕彪等十有七人。比矜疑例。調發邊衛充軍。

三月。虜寇山海關。總督尚書許論禦之。倭寇破平和縣。

夏四月賑順天饑民

寧夏地震

逮繫祭酒沈坤于詔獄考訊

南京御史林潤劾坤不職坤奏辯帝怒下鎮撫司鞫之

附錄御史耿定向劾吏部尚書吳鵬屬壻董份主順天鄉試私其子吳紹中以魁選及受江都知縣李一科苞苴擢授司屬不報

給事中曾廉劾巡撫應天都御史翁大立不職吏部覆奏大立率易更張有失衆心命還里聽用

五月加胡宗憲兵部尚書兼右都御史仍督沿海軍務

初南京御史李瑚劾宗憲要功致寇下兵部議許獲一
上不問已而閩廣浙直倭寇日熾福建巡按樊獻科請
趣宗憲赴閩應援浙江巡按周斯盛請勅兵部趣宗憲
督師剿寇以弭海患宗憲聞命泄泄如故已而寇稍
解散竟以功進兵部尚書沿海撫巡諸官悉聽節制其
體統如三邊而勲臣總兵者亦由掖門通謁庭拜下風
矣

附錄潞城王府中尉俊彙謀殺宗人巡撫大同都御史
李文進以狀聞帝以俊彙罪重有違祖訓勒令自
殺

六月香山新會等縣地震有聲

以都御史鄔懋卿總理天下鹽運。

嵩以懋卿鄉人。奏總鹽利。于是懋卿開通苞苴。殆無虛日。故事。諸府縣巡檢司邏卒。責捕鹽盜。縱脫遺漏者。罪之不克。以次懋卿奏立尅限法。每卒一人。季限獲鹽若干斤。販夫若干名。舟若干艘。其有舟無販夫。有鹽無舟。及有販夫無舟鹽者。不錄。其鹽與販夫不及若干數。亦不錄。俱削其雇役錢。存帑以充舟鹽之值。故邏卒遇無私販。有終歲不得支一雇錢者。而身羈役籍。不遑爲生產。徃徃共行私販牟大利。遇商舶旅舟。反誣爲鹽盜。拷劫之。少拂意。輒以私鹽強頓舟中。而誣其人爲販夫。白致刑獄。至有死亡者。害不可言。其有司又或增賦于民。

徵金作舟鹽之值不復責邏卒以糾捕而私鹽任其橫行矣貽患至今牢不可變。

大朝午門樓觀成。

秋七月。

冬十月。棄侍郎王忬。給事中楊允繩于市。

十有一月無雪。

帝以入冬無雪躬禱于雷壇久之雪降時以爲靈雪。羣臣表賀。

秉一真人陶仲文死。賜諡榮康惠肅。

辛酉嘉靖四十年正月。陝西獻白鹿。

時白鹿出商南山萬壽宮前芝叢中。土人得之。撫摩。

鹿采芝以獻羣臣表賀。

二月辛卯朔日食不見。

是日申酉間日當食陰雲不見。嵩等謂自申至酉雲朗不晦冥應食不食。請帝舉人謝禮。從之。羣臣表賀。

南京錦衣衛獻白兔。

南錦衣衛指揮徐繼勛進獻白兔。羣臣表賀。

京師不雨。

帝禱雷壇得雨。羣臣表賀。

景王之國德安府。

卒從郭希顏之議也。不二年王薨無子國絕。

夏四月分遣御史于天下訪求異人異書。

時遣王大任姜儆奚鳳等分詣海內訪求仙術異人及符篆秘方諸書

五月蘇松嘉湖大水無稻苗

時霖雨彌月湖陂俱溢平地水深丈餘稻蔕俱沒

六月袁煒進太子太保兼武英殿大學士入閣叅預機務時帝漸有疑嵩意密諭階舉堪輔政者階密奏曰傳云人君以論相爲職夫百官孰非當論而獨云爾者以相位高任重必由人君自論然後見恩自上出而命且上制也惟乞皇上斷自宸衷簡用一二與臣等同事則政體明而窺視陰阻之私自杜矣帝乃特命煒以學士入閣

秋八月嘉禾生御田

時御田產嘉穀異穎同本者四十有九。田官以獻羣臣表賀。

冬十月遣戶部大臣往覈薊鎮宣大兵餉。

先是帝屢諭階以虜患當備。階上言金城湯池無粟不守。今諸邊言缺食甚苦。而戶部稱給發已多。中間獎源必有所在。乞諭戶兵部根究清理。乃久安之策也。

帝然之。欲治諸姦貪。階復上言。姦貪侵冒其弊最大。其次亦有二端。曰民運拖欠。不行催徵。給發後時。糴買價貴。故得最少。湏本末兼理庶幾有益。帝然之。因諭遣戶部侍郎一人。前往薊鎮宣大清理邊餉。務先治貪姦。

諸弊

十一月淮王獻白鴈。

淮王獻白鴈二羣臣表賀。

十有二月營萬壽宮。

帝自壬寅以後常御西內數年以來恒御于顯法宮玄都殿而殿宇湫隘巷道衝偏羣臣以爲憂至是帝諭輔臣階營萬壽宮階任之命工部侍郎朱衡總其事許論罷。

論被劾回籍聽覈以楊選爲兵部侍郎代論總督。

吳鵬罷吳山奪職。

以歐陽必進爲吏部尚書袁煒爲禮部尚書。

十有一月袁煒進太子太保入閣罷吏部尚書歐陽必進以郭朴爲吏部尚書

壬戌嘉靖四十有一年春三月萬壽宮成加大學士階少師復任一子煒少保

帝欲速成故不三月而告完宮中有壽源萬春太玄仙禧諸殿極其宏麗帝大悅工部請加恩諸臣帝以階竭忠盡勤加少師兼支尚書及大學士俸再廢一子爲中書舍人階疏辭不允止免兼學士俸

策士奉天殿

賜徐時行等三百人及第出身

夏四月不雨

帝諭輔臣祈雨。階上言。宜行順天府祈之。

五月。嚴嵩罷。猶給歲祿。繫其子世蕃于詔獄。以御史鄒應龍爲通政司叅議。

初。嵩見張璁。夏言以言禮驟貴。乃從吏興獻帝稱宗

祔太廟。帝從之。自是眷遇日隆。人言不復入。自徐

學詩王宗茂斥謫而縉紳側目。楊繼盛沈鍊死而言者

屏息。吳時來張翀董傳策戍邊而朝野握手莫敢復及

嵩又專伺帝意爲迎合計。結納諸奄人。偵大內動靜

密白之。朝夕以數十至。嵩隨其巨細。裹錢勞之。以故諸

奄人德嵩。連白不少輟。而嵩因得以知帝所欲爲。將

迎之。帝晚年好玄祀。言者嘖嘖不已。嵩獨以爲然。屢

撰青詞供奉壇殿間。帝賜以香葉巾、軟帛履。命從諸貴人拜起。嵩唯唯不之違。以故。帝眷爲不衰云。其子世蕃以父任。歷官工部左侍郎。貪恣狠愎。無所不至。以中書舍人羅龍文爲心膂。劾養嚴年爲羽翼。鬻官剝民。公行不忌。帝亦微知之。然念嵩嫵媚不欲發。至是御史鄒應龍上疏劾世蕃。數其通賄敗檢諸惡狀。乞置于理。因及嵩植黨蔽賢。乞加斥罰。且曰。如臣言不實。願斬臣首懸之棗竿。以謝世蕃父子。帝覽之心動。乃降旨曰。嚴嵩力贊玄修。壽君愛國。人所積惡。旣多年矣。却縱愛逆子。言聽計行。不復思朕優眷。特命致仕。乘傳以去。仍歲給祿米百石。世蕃等各犯。命錦衣衛逮赴鎮撫。

司考訊鄒應龍盡忠言事當有特嘉吏禮二部擬官以聞。于是擢應龍爲通政司右叅議。

六月廣東盜張璉伏誅。

自倭寇滋蔓福建江西諸路不逞姦民所在蠭起而廣東爲尤甚。渠魁張璉林朝曦黃啟薦等築城置郊自保。建官紀元攻劫郡縣爲患日大。帝憂之。總督尚書胡宗憲不能爲計。上疏自言中風願乞骸骨。言官劾其托疾避艱。置不問。宗憲遷延待命。先奏以三月十有六日進兵剿賊。旣而易爲四月十有八日。凡徵集狼兵十餘萬人。久聚待哺。帝頗疑之。手諭元輔階曰。東南寇氛何如。宗憲果有疾否。階上言寇氛可慮。宗憲疾雖稍愈。

未嘗親行督剿。帝又云。尚書博何不運謀滅之。階以語博。博奏令都督劉顯。叅將劉大猷。帶領家卒。往督狼兵赴剿。又徵發永順土兵。以爲先聲。以寒逆寇之膽。帝皆從之。顯等聞命。馳至廣永。督兵進攻。大破之。遂擒張璉。餘黨解散。其林朝曦。黃啟薦。逸去。遁于海島。不復敢出。捷聞。羣臣表賀。顯等遂領家卒。往福建收剿水陸盜賊。數月俱平。

秋七月。內苑獻嘉禾。

內苑獻穀一莖三穗者。兩穗者。三十有一。羣臣表賀。皇極中極建極殿成。

三殿告成。乃易奉天殿爲皇極殿。華蓋謹身二殿爲中

極殿及名東西二閣爲文昭武成左右四門爲弘政宣治會極歸極羣臣表賀。

八月重錄永樂大典。

帝以典帙萬計不便拒置欲重錄一部以副皇祖之制乃諭階董其事以禮部侍郎高拱兼翰林院學士副之開館繕寫。

冬十有一月逮繫胡宗憲尋釋之削籍歸。

南京給事中陸鳳儀等上言宗憲有十大罪潛結海寇王直欺天冒功大罪一也奉旨會剿江閩羣盜偷安不行違旨玩寇大罪二也虛張兵數侵蝕軍需大罪三也延納贊畫嚴中茅坤蔣孝呂希周田汝成等競爲奔僭。

糜費無紀。大罪四也。扣減織造價值。侵盜誤國。大罪五也。遍府驛。派解廩給銀兩。縱吏舍騙索廩糧馬匹。流毒驛傳。大罪六也。私出把總僉總告身。賣官通賄。大罪七也。以杭州衛官廠私餽鄉官茅坤。徇私滅公。大罪八也。私役官兵以之送子守家。爲門子報怨。大罪九也。娶杭州部民洪梗女爲妻。留卒役來住。徐子明之妻于督府。宣淫敗度。大罪十也。乞將宗憲罷斥。別選才良。以紓南顧之懷。章下。吏部覆奏宜置于理。帝然之。命差官校逮繫宗憲赴京考訊。已而獄具。削籍爲民。

能設浙閩總督大臣。

胡宗憲敗。帝諭階。浙閩總督似不必設。階上言地方

已就平寧。百姓遭宗憲擾害之後。有資綏輯。止宜設巡撫重臣。于勅內開載。浙直有警。互相應援之語。似爲便益。從之。乃以趙炳然爲右都御史。巡撫其地。

加公朱希忠太師。

癸亥。嘉靖四十有二年。春正月。

附錄帝問階同官可增一人。誰堪其任者。階上言。知臣莫若君。皇上聖明天縱。廷臣才品。莫逃聖鑑。第此官位高地近。不專在有材。湏得平正謹實者。乃不敢憑籍債事。帝又諭曰。知臣惟有堯舜與太祖耳。若嵩乃我簡任。至于如此。後世宮育之主。豈知人焉。階又上言。嵩材足輔政。初皇上用之。未有不可。乃嵩怙寵而驕。

宦成而怠。過聽其子。而子之貪狼。又特異常人。致負
聖恩耳。昔堯用四凶。後加放殛。太祖用李善長。胡惟
庸。終以罪誅。皇上之于嵩。真與帝堯。太祖前後合
轍者也。茲乞簡自宸衷。降初宣示。以協正理。以崇主
權。帝又諭曰。四凶惟庸之類。非堯與。太祖之不知。
彼不終慎耳。然堯爲聖人之首。太祖何事不知。尚且
如此。後世內育。安及萬一。嵩罪非在聽子。乃縱之。病國
戕民耳。階又上言。捧讀聖諭。仰見皇上聖不自聖。
之心。然自古人心難測。蓋有大姦似忠。大詐似信者。此
知人之所以難也。惟廣聽納。則窮凶極惡。自有人以嬰
之。深情隱慝。自有人以發之。未用者不至濫進。已用者

不至倖留。不下堂陛。而周知天下之情矣。高縱子病國。戕民。誠如聖諭。然使早有人言。亦豈得至此之甚哉。故已有言。必詳加詢察。事大而言實者行之。其不實者小則置之。事大亦薄其責而容之。務以來天下之言耳。此法行則利在朝廷。而不利在臣下。否則臣下受其利。而不利歸朝廷矣。臣愛朝廷重于愛身。故輒及此。帝嘉納之。

五月。復逮繫胡宗憲。詣京。宗憲自殺。

是歲大計京官。復有言宗憲未盡法者。有旨逮治。旣而憲至京。服藥死。

以嚴訥爲吏部尚書。

郭朴丁父艱去位訥代之。

夏六月不雨。

帝禱雷壇得之羣臣表賀。

秋七月。

附錄帝諭階曰。斯今忠善爲多。而邪罔亦不少。即段疋故違明限之類。終不絕。皆謗事上玄爲之也。階上言。段疋違限。原係有司貪肆。以納賄爲捷徑。以織務爲無益。循習致然。非由謗事上玄也。今爲皇上計。惟于用舍之際。審賢否。核功罪。辨勸情。塞苞苴之門。杜請託之路。則百事皆可幹濟。不止段疋一事。不至違限而已。帝曰。欺謗不盡無。而貪肆者爲甚。國虧民苦。悉此等所爲。

祖宗法度。視爲渺耳。此本要冢宰力行。階復上言。祖宗法度。本極嚴明。使爲臣者。不以利欲蔽其良心。豈至公然違犯。使國虧民苦哉。此在羣臣。均干天憲。而大臣不能倡率百僚。又不能斥去此屬。其罪尤重矣。訥在吏部。殊有志守法。第恐請託旣絕。不免怨謗。仰賴聖明主持耳。帝嘉納之。

八月嘉禾生御田。

御田產嘉穀一莖四穗者三本。二穗者六本。兩穗者八十有一本。田官以獻。羣臣表賀。

御苑龜生卵。

龜生卵者五。羣臣表賀。

巡撫湖廣都御史徐南金獻白鵲

南金言白鵲出自景陵獻之羣臣表賀

虜寇遼東總兵官楊照追虜于塞外死之

初遼東自戊午以後邊垣頽圯士卒損傷照以智勇廉潔鎮之虜頗畏縮後與邊儲郎中相失互爲訐奏奪其官繼照者惟務苟全邊事日非人心危懼巡撫都御史吉澄上疏言之帝詔于輔臣階階復薦照可用帝從之仍以照爲總兵官照感激國恩湔盡忠報國字于胸背間以死自誓至是虜犯遼東照逐出之復乘勝追虜遠出塞外遇伏敗績力戰死帝聞之悼惜卹錄甚厚

九月。廢伊王典樸爲庶人。

初。王嗜酒。僭侈所爲多不法。言官劾其陰蓄異志。恣行僭擬。禮兵二部請正國典。帝念親親。姑奪歲祿罰之。王不悛。益怨望。詛呪。旣而訛聞嚴世蕃父子有篡立意。乃行白金十餘萬兩賂世蕃受之。王意嚴氏父子戴已。益跋扈。私造軍器械。陰養戰馬。圖大舉。又爲九五當乾牌。置官府中。而強選民間女子十五以上者數十百人。不從則闔門搜致。怨聲載道。有仕人陳大壯者。居與府隣。王欲得其址。不予。王令校卒執大壯至府。捽而笞之。拔其髭鬚殆盡。大壯忿恨死。世蕃敗。王惜其賂。遣優人三十餘走分宜。索所賂金。世蕃不得已還之。使其黨邀。

于吉安隘盡殺其優人。劫其金。以故事頗章聞有分守河南叅議耿隨卿者。廉知其狀。自巡按御史顏鯨上之。章下。禮部法司俱請置重典。帝不允。乃命廢爲庶人。禁錮之。沒其所有。九五牌尚在。遂黜其國。

冬十月虜入薊州塞。大掠通州諸處。

初九日乙未。有暴風自北起。帝諭輔臣以兵火當慎。且云楊照之事可鑒也。階傳示兵部。移檄各邊備預至。是宣大總督江東檄報虜衆數萬。迤逗東行。兵部尚書楊博。卽遍檄各鎮將領預整士馬。備應援。而令沿邊謹斥候。嚴烽燧。毋使虜入。先是諜虜寇薊遼東。博聞之急。趣選還。選未至而虜衆已薄牆子嶺矣。丙寅虜攻嶺甚。

急選督兵拒之。斬其二首。選自以爲功。具奏馳聞。是夜虜破牆子嶺。擁衆大人。丁卯屯平谷縣。進掠通州。未刻警報至京。是夜帝于宮中望見東南火影。諭輔臣階。遣官奏告郊廟。傳示兵部。及提督京營顧寰等。協力逐剿。分兵護守重城諸門。塞水關。屯要衝。趣各鎮兵入援。戊辰楊選督兵尾虜。亦至通州。是夜總兵馬芳帶領裨將補千漢兵馬五千人至京。己巳宣大總督兵部尚書江東督兵亦至。庚午總兵姜應熊亦至。帝命馬芳督兵守重城。發帑犒其士馬。是時楊選亦至東直門外。博令抽其重兵助守重城。及令馬芳屯廣渠以當通州入京之路。階又請勅江東總督城外官兵。楊選以下俱聽節。

三曰大正紀 卷二十一 四 帝欲本
制從之。又令管英徐紳往護通州。袁正往護潞河灣。馬
芳補于漢專衛陵寢。而命戶部發廩煮粥以餉諸軍。是
時 帝懲庚戌之變。憂惶備至。御劄日十數下。詢諮輔
臣。使問兵部退虜之策。階宣布奏白。調護行之。不遺餘
力。

總兵官胡鎮逐虜于通州。裨將孫臚死之。

初虜至通州。往掠香河諸縣。已而還經通州歸平谷。楊
選部領胡鎮孫臚等諸將追虜于通州。江東往屯順義。
欲令選等邀虜于古北口。廷議不可。乃令姜應熊麻錦
設伏古北口。而選等仍躡虜通州之河東。時 帝欲本
兵畫付諸將。內外夾擊。以伸華威。博趣選等擊之。選不

得已命胡鎮孫臆與王孟夏黃演馬承胤等會兵逐剿而鎮等饑罷之餘不能自振庚午遇虜通州之野鎮頗斬馘數級乘勝逐北身被六創裹血力戰獲首虜三百餘級叅將孫臆獨當一隊陷陣死之虜乃迤逗北去江東檄諸將邀擊于古北口斬獲無算追逐出塞而還京師解嚴

逮繫總督薊遼侍郎楊選及整飭薊州邊備都御史徐紳于詔獄楊選論死棄市

帝以虜由薊鎮出入怒選等失職命遣官校械繫選及都御史徐紳詣京下鎮撫司考訊而以兵部右侍郎劉燾代選以僉都御史溫景葵代紳已而獄具楊選論死

斬于都市。徐紳削籍爲民。初言官李瑜劾選及江東等請同加罪。帝以爲過。諮于階。階言江東不宜與選同論。故東得免。階又言胡鎮襲創逐虜亦既有功宜加恩。賚其營卒被傷及陣亡者。奏請優卹俱從之。又言宣大重地恐虜乘虛竊犯宜將總兵官馬芳姜應熊發回防守。亦從之。初帝以階言命江東次第勤王功次及東疏上下兵部覆議恩勞而不及輔臣本兵。帝以爲此故事不可少。階上言臣等不能仰贊廟謨宥罪已戴洪慈恩予豈所敢望。帝曰博等全不畏天又不自責。直欺世無君肆已。今不與恩賚或積後禍。階力言其無他。且曰廷臣中才識通敏熟知邊事無如博者。惟皇

上優容。責其後効可也。從之。

十有一月無雪。

帝祈得之。羣臣表賀。

附錄。吏部尚書嚴訥推舉二人不當。帝意。帝謂階曰。吏部何以此才當此任耶。縱無他私。亦不宜動循資格。必更之。階上言。循資按格。其來已久。訥初至部。未能破去積習。須仗聖明特諭掄材。庶訥有所遵奉耳。更有二事。輒敢附聞。一曰尊主權。臣每見明旨下及內外。多不遵奉。如勘功罪。動至經年。徵錢穀。寂無一字。禁私餽。則潛行于昏夜。以售欺。劾貪肆。則聊及于孤寒。以塞責。是主權未尊也。一曰定國是。臣竊見士夫以虛文巧飾。

爲有才而誠慤者則詆以爲拙以怙勢作威爲風力而敬慎者則笑以爲懦以怠安泄沓爲得體而勤勵者則鄙以爲俗流以容姦庇惡爲長厚而明作者則謗以爲生事甚至以謀國爲過計以卹民爲迂譚以持法爲苛刻以秉公爲乖僻是國是未定也夫二者平時尚能敗政况欲能建立于多事之秋以仰副安內攘外之心乎乞諭諸司示以賞罰使賢者有所恃而爲善不肖者有所畏而不敢爲惡庶于政治有補矣帝嘉納之命階指其主名諭之階上言當恕其已往而戒其將來苟有犯者必罪不赦又申嚴賊罪之律凡賊皆沒官枉法皆絞即自畏懼而改圖矣從之

十有二月京師大風

時有風變占在土功工部尚書雷禮請建京師重城帝詢于階階言重城保障之效觀南城可睹但不築則已築則必圖可守不然關係匪輕帝謂禮實爲之所謂未賴階不復言然而終不果築

甲子嘉靖四十有三年春正月城潞河灣

先是朵顏夷人言北虜復將內犯帝命內外嚴備禦順天府尹劉畿上言潞河張家灣宜築城障以便乘守計用工銀五萬六千餘兩已有三分之二乞借光祿銀三萬大工可濟階言于帝從之已而劉壽等徵集鎮兵嚴爲戍守虜不果來

三月不雨。

附錄是時京師有呂某者以白社法惑衆陰結亡賴千餘人僞授職官給以告身約于八月謀逆北連兵富虜衆以圖大舉而河南山東宣人真順等處妖人尤衆互相援結煽惑愚民不下數萬有李應乾者居河南之濟源一目微眇兩手涇以日月字懷衛間之不逞者推以爲主陰鑄印章數百座以待用置太白旗數十給付各小帥以爲會兵符驗約于四月八日起事人莫之知是月呂某者謀泄有人以僞告身二帙辟穀藥餌一裹首白輔臣階者階發兵部傳遣官校緝獲呂某鞠實奏聞因命內外搜捕應乾逃匿山西父之乃獲各伏誅。

夏四月大雪。

帝以久旱大雪于郊廟社稷及各壇殿久之得雨羣臣表賀。

秋七月。

冬十月罷寶源局鑄錢。

初從廷議命寶源局及南京雲南鑄造嘉靖制錢發民間貿易既而所鑄不一有金背火漆錠邊等名民頗通行父之言官建議鑄錠艱難工匠勞費請革去錠車以鑪湯代之從之于是鑄工競維鉛錫圖便剝治而輪郭龕穢色澤漆暗與前迥大不侔矣由是姦僞之徒倣倣盜鑄濫惡日滋貿易不通至有朝入手而暮廢棄者商

民悔忿併金背等錢俱不受授問閭大困其盜鑄日報罪死終不能止帝憂之問階弊源階詳舉顛末奏之因上請曰臣切惟濫僞諸錢旣不能強民通行而寶源局仍鑄不已有五害焉戶工二部每歲以二萬八千餘金投諸無用之地一也中姦猾之計開私鑄之門二也朝廷以此給賞中外臣工而蒙賞者受而無用虛皇上之恩三也官府以此給于商民而領受者有虧苦之怨四也局中之人坐享其利而朝廷之錢法日阻禁嚴之令因之不行虧損國體五也臣等愚見不若停止寶源局鑄其部中應給錢者即以鑄錢之銀代之則姦弊革而私鑄止國法伸而羣情便矣從之

命戶部計裕國儲

初帝問階太倉今有盈餘否階上言近年太倉止有三二年之儲而一歲所入僅足歲出惟有前歲四月米賤給放折免銀十萬省出月米八萬石耳因言折免之法行于水旱之歲以裕災民放于米賤之時以增倉儲軍民兩濟是在戶部留意行之耳帝因諭戶部講求國計戶部尚書高耀條列八事以聞帝從之戶科給事中李邦義復上言理財之道生衆食寡爲疾用舒而已今開財之法撙括殆盡矣充畜之計舍樽節其何以哉乃錦衣衛恩廩之輩踵接肩摩各衙門帶銜之官日增月益冒濫之費不可不爲之慮矣戶部計支月米二

十四萬五千餘石而管操諸卒止于九萬餘皆錦衣官校各衛吏士官攢匠役諸色臣訪此項有以一吏而月冒數乘有以一人而月領數石考求其故則以士馬之實數司農不得而知也錢穀之出數司馬不得而稽也以無爲有之弊亦將何所不至哉握韜鈴者一聞警報而調遣先發邊餉焉得而不糜在薊鎮則有百里全支五十里半支之例而宣大等鎮未之議焉或非畫一之法與舊制太倉解發金錢止以供客兵之用而主兵則取足于民運與夫屯租秋青耳邇來各邊屯場俱稱拋荒一遇缺乏即行奏討太倉如之何而不匱也乞勅該部查議酌處則錢穀不思不節縮矣夫國計民瘼事本

相須近者徐淮等處水旱爲災十室九空逃亡過半而該部猶靳改折弗肯全予或有脫中之呼關係不小是不可不爲之慮也帝嘉納之

十有一月旱風霾大計京官鄆懋卿劄籍

時旱暵經時風霾示異從言官之請大計兩京羣工四品以上自劾聽去留于是懋卿穢迹著矣猶得倖脫南京御史林潤上言懋卿自蔑憲典罔法行私所過郡縣掊剋無遺一運司取十萬兩黷貨無厭爲罪一也商民王鑑吳章被訟公行苞苴千有餘兩大喪名檢爲罪二也恫喝淮陽巡撫劉景韶延金巨萬始得驩顏往謁皇陵攜領俳優變役糜費無極反道悖禮爲罪三也較

輒有司暴虐百姓。箠死場官。姚佩。厨夫蔡經。而平民斃
杖下者。二十二人。殘忍酷毒。爲罪四也。比直山東。餓莩
枕藉。揚州水災。剝削流竄。而勢必取盈。無名派擾。去歲
塩盜幾聚爲亂。動搖國本。斲傷元氣。爲罪五也。乞將懋
卿速賜罷黜。庶民怨消。而士論快耳。章下吏部覆奏。從
之。南北商民歡舞于道。

收嚴嵩子世蕃。及羅龍文詣京。

初世蕃編戍雷州。行至南雄而返。而羅龍文亦逃伍。潛
住欽縣。藏匿亡命。爲逋逃淵藪。有巡江御史林潤移檄
徽州府推官栗祁。密捕龍文。龍文微知之。走匿世蕃家。
是時世蕃以營建室宇。聚斂役四千餘人。辰集夜散。詭

秘叵測。袁州府推官郭諫臣白諸監司散遣之。已而世蕃聞閩廣羣盜欲掠其家。復陰蓄家卒千餘人備之。由是人心疑懼。嘖嘖不已。潤乃上疏言其狀。請置二人于理。帝然之。即命潤收捕二人。詣京即訊。

十有二月。比畿山東大饑。

連年荒歉。是歲尤甚。

乙丑。嘉靖四十有四年。春三月。賑畿內饑民。

時各處饑饉。京師餓殍尤衆。加以疫癘流染。死亡枕藉。帝欲作粥施餌。以拯灾疾。輔臣階上言。粥餌之施。有名無益。况給散無紀。則強壯者幸而關領。老羸者多致踐踏而亡。帝曰。二事俱增民病。出粟又無多積。衆灾難。

免矣。階曰：往歲出粟，不過二三千石。太倉雖無多積，尚足辦此。但京師出粟，四方貧民聞之，多有匍匐而至者。至則施畢空歸，顛殞道路矣。宜令戶部出粟，止給京民。其在外者，行令撫按官一體賑給。仍諭遠邇元元，各于郡縣候賑，勿得來京，庶乎全活爲多矣。從之。

三月，西千步廊火。

帝諭階曰：昨火處，乃文積近地。他日纂修何稽焉？當預計之。階上言：據官監左祿云：正德十六年以來，內外題奏及四方番文，計八十三萬二千餘本，俱貯六科廊內。其千步廊所積，乃先朝遺疏，已經纂修者，不必別有計處。帝然之。

策士皇極殿。

賜范應期等及第出身。

袁煒致仕尋卒。

煒歷加少師兼太子太傅建極殿大學士久病不愈疏乞致仕許之卒于途謚文榮階請補輔臣帝曰此官宜四三員成祖之制有爲也嵩專二十年欺君肆誑而畏惡子可怒階上言閣臣地親任重祖宗時每用四三員蓋不欲權有所專而先臣亦無敢專者自夏言暴狠人莫敢犯繼以嵩受制逆子欲便其私于是事皆獨斷而權始有所專矣皇上欲復祖制誠攬乾綱收政柄之要務臣以爲此官不但宜多仍須擇廉靜謹畏

者用之方可望其不專也。至于首員，但三五員，容令解職，則彼不得據其位，而恩威常在于上矣。帝疑階欲求退，讓之階，疏謝焉。

嚴嵩削籍，沒其家。其子世蕃及羅龍文俱棄市。

初，林潤聞命，馳至九江，收世蕃、龍文等，因檄袁州府、細具嚴氏諸暴橫狀，得之，復上疏數世蕃父子罪。其略曰：世蕃罪惡滔天，積非一日。任彭孔為主，畫龍文為羽翼。嚴鵠、嚴珍二等為爪牙，窮兇極欲，無所不至。占會城廩倉，吞宗藩府地，奪平民居房，而又改祝釐之官，以為家祠，鑿穿城之池，以象西海，城列五府，分居子父，廊廡週迴，宇舍環遶，以數里計，招集亡命，為護衛丁卒，森然

分封之度也。總天下之貨寶，盡入其家。富踰天府，粉黛之女，列屋駢居。衣皆龍鳳之文，飾盡珠玉之華。張象床，圍金帶，朝歌暮絃，宣淫無耻。畜養士卒，已踰二千。招納叛逆，更倍其數。精悍皆在其中。妖妄並藏于內，旦則伐鼓而聚，暮則鳴金而解。故劉相誼文攀錦洪斗段回等數十百人，明稱官舍，出沒江廣，劫掠士民，淫污婦女，府縣禽治，招明據矣。其家人壽二銀，一等數十人，怙勢肆惡，姦殺吞騙，半歲之間，事發者二十有七。其陰秘抑捺，不知何限。且陰結典樸，計殺索賊之衆。居朝則爲寧賢，居鄉則爲逆濠，以一人之身，而總羣姦之惡矣。雖赤其族，猶有餘辜。嚴嵩不顧子未赴伍，朦朧請移近衛。旣奉

明旨復留在家欺君爲甚有司受詞數千盡送與嵩
嵩檢閱其詞而處分之然則世蕃之惡嵩又諉于不知
臣未之信也伏乞聖明乾斷少加切責以爲人臣欺
君之戒帝怒併世蕃等俱下法司鞠究刑部尚書黃
光昇都察院左都御史張永明大理卿張守真等會鞠
明實論世蕃處斬奏上帝謂階曰奏內不言逆本是
何法制嚴嵩等俱削籍爲民有司拘管當差其盜用官
銀財貨家產盡沒入官餘黨逆邪盡行逐治卿爲按法
擬旨進覽階奉諭擬上遂斬世蕃于市已而籍其家得
銀二百五萬五千餘兩其珍異充斥踰于天府不啻也
亡何嵩寄食故舊以死

帝不豫

時帝久御西內思成宮每有黑氛出擾而披欄藻井上忽見木錦數圍帝心疑之諭階內火當慎且曰天佑無象惟逆邪作祟不可不爲之防階慰解之至是聖體違和中氣不足面頰作痛諭階知之

夏四月以吏部尚書嚴訥禮部尚書李春芳俱兼武英殿大學士入閣叅贊機務

時階屢請添補閣臣帝不允階曰機密之地非臣所當獨居事務繁多非臣所能獨辦況犬馬之齒已六十有三矣思慮不能精審記憶不能周詳事必遺忘而錯謬精神不能應卒筋力不能任勞事必遲悞而曠弛他

日罪愆叢積悔何及乎。帝欲付之廷推以服人心。階言羣臣才品無逃。聖鑒不如簡自宸衷。使政權自上猶得馭下之要也。帝然之。乃以訥春芳兼學士入閣。已而俱改武英殿大學士。

以郭朴爲吏部尚書。

朴服闋復起用之。

諭輔臣階內禪。

時黑氛擾害。帝疑慮之。因諭輔臣欲禪位裕王。階上言。皇上百神之主也。妖何敢干。或左右事有過誤。委諸邪逆。以倖免罪責。故證以爲真耳。聖明察之。當自見也。我朝原無禪例。前代亦非美談。所不必言。若攝

行政事與禪無異。亦所不當言也。惟有舉行冊立爲本朝彝典。此必斷自聖心。使恩出自上。乃可耳。帝不許。而禪議亦中止矣。

五月。方士藍田王胡大順論死。

初有藍道行者。以方術見帝。帝頗信之。已而事敗下獄死。又有元明至顯者。亦倖于帝。其徒何廷玉妄製藥物。託藍田王上之。田王道行之徒也。嚴世蕃助使來京者。言廷玉藥物乃仙箕批製。帝疑之。以問輔臣階階力言其詐妄不可用。帝置之。先是胡大順亦倖于帝。事敗斥去。帝與田王語。偶及大順。田王亦爲帝念之也。遂與羅萬象者。詐傳密旨。取大順至京。更名胡

以寧薦揚于帝。且奏求圖書及建宮地。帝命以寧入見。至則大順也。帝惡之。然是時宮中屢有氛孽。田王等遂以藍道行下獄。故有此崇。欲以動帝。帝頗惑之。欲用田王等。冀清宮孽。又有謂宮孽非他。乃壬寅冬官變。誅死枉抑者爲之。帝以問輔臣。階曰。藍胡輩可仍用否。階上言。胡大順無賴小人。不畏法紀。藍田王尤甚。本無足取。皇上以百孽擾官。疑爲道行下獄。有所使然。但宮孽已久。恐非彼所致者。且不能必其用此二人。宮孽果息也。不若治之以法之爲正。帝然之。因諭曰。此而不治。無以戒來。有謂宮孽爲壬寅枉死者。所爲是否。階上言。藍田王乃世蕃之黨。妄進白鉛。其意叵測。

至于詐傳密旨罪惡尤甚伏望聖明速斷以消隱憂
至于宮孽謂爲壬寅死者有枉此却有見蓋一婦含冤
三年不雨彼旣生爲貴近歿受抑枉能不爲厲耶但事
在宮禁不知枉者爲誰惟皇主察處之帝乃命收
大順等下鎮撫司考訊旣而招牽陶仲文同渠扶箕
帝大怒命悉論死

帝還宮

帝體平復乃自思成還御乾清宮羣臣表賀帝以乾
清宮丹雘渝落不稱路寢命更飾之

六月以高拱爲禮部尚書

時董份被劾削籍以拱代之

有芝生于太廟。

有芝生于太廟第三室。羣臣表賀。

秋七月。四川盜蔡百貫陷合州諸處。

有白社田統者。以邪術蠱衆。推百貫爲主。嘯聚數千人。攻陷合州等七郡縣。三川俱震。久之乃平。

河決徐沛漕渠堙。

時河水泛濫。決徐沛之飛雲橋。東流逾漕。入昭陽湖。汎濫而東。平地水丈餘。舟行木末。十日而退。則漕渠湮沒無迹矣。上下凡百里。時運艘過沛。才三之二。餘滯不通。九月。鑿新渠。

初漕渠左視昭陽湖。其地沮洳。去河不數十里。識者危。

之嘉靖初盛應期督漕議鑿渠湖左以避河患朝廷從之應期鳩衆就鑿未半爲異議所阻而止至是漕堙以吏部左侍郎朱衡出督濬鑿衡躬自行河尋應期所開故迹視之以爲運道之利無逾于此疏請鑿之下工部覆議從之自南陽鎮至留城計百有四十餘里冬十月河東卒叛以趙炳然總督宣大軍務

逮繫戶部主事海瑞于詔獄

初瑞爲知縣發都御史篋中贓過縣境者以剛正動一時至是爲戶部主事抗疏言曰陛下初年剷除積弊煥然與天下更始高漢文帝遠甚然文帝能充其仁恕之性節用愛人三代以後皆稱賢君陛下則銳精未

久妄念奉之而去矣。謂長生可得。一意玄修。竭民膏脂。侈興土木。二十餘年。不視朝政。法紀弛矣。數行推廣事例。名器濫矣。二王不相見。人以為薄于父子。以猜疑戮辱臣下。人以為薄于君臣。采西苑而不返。人以為薄于夫婦。賦役煩增。萬方懸磬。十餘年來。天下極矣。不及漢文帝遠甚。天下之人不直。陛下久矣。內外臣工之所知也。知之而諱言。乃修齋修醮。相率進香。天桃天藥。相率表賀。興建宮室。工部極力經營。買香市壁。戶部差求四出。陛下誤為之。諸臣誤順之。無一人為陛下正言焉。諛之甚也。陛下之誤多矣。大端在玄修。玄修所以求長生也。堯舜禹湯文武之為君。聖之至也。未能

久世不終。下之方外士亦未見有歷漢唐至今日猶
使陛下得以訪其術者。陛下師事留仲文。仲文
已死矣。仲文尚不能長生。而陛下獨何求之。若夫天
桃天藥。惟妄尤甚。玄修之無益可知矣。陛下誠知玄
修之無益。翻然悟悔。日視正朝。宰輔九卿侍從諫議相
與講求天下利害。洗數十年道君之誤。置其身于堯舜
禹湯文武之域。使其臣亦洗數十年阿君之耻。置其身
于臯陶伊傅之列。明良喜起。都兪吁咈。民物熙洽。薰爲
太和。道與天通。命由我立。而陛下性分中自有真壽
矣。惟陛下留神。宗廟幸甚。天下幸甚。疏入。帝大
怒。命逮繫瑞。下鎮撫獄。長繫之。

皇明大政紀
二十四卷
復諭階內禪。

帝因瑞疏諭輔臣曰。今人恨不新其政。瑞可見也。疏言俱是。朕今病久。不如甲子前矣。安能視事。惟傳繼爲第一計。卿等擬旨行之。階上言。瑞誠狂妄。然未嘗一言及于傳繼。臣等不敢聞命。帝復諭曰。朕承仰天眷。不自謹惜。致此病弱。如能御政。豈能受此人詬詈也。此不可並處。別行計議耳。階上言。臣聞主聖則臣直。瑞誠不可與並處。惟聖度如天地。無所不受。况能容所難容。然後見所容之大也。帝復曰。朕謂不可並處者。乃以既新其政。其君御此。如忌尊無二上。別于南京。建一宮宇。居朕。何貶。豈謂海瑞耶。階上言。此天下古今必無之理。

必不可行之事。臣等萬萬不敢聞命。乃止。
十有一月。嚴訥罷。

附錄初供用庫匠役名數。先經司禮監太監黃錦查議。
應留二百八十九名。至是該庫奏乞增收百名。工部覆。
題止補舊額。不得增收。管庫內臣復行奏乞。階上言。人。
匠一名。歲止月米一十二石。百名則千二百石矣。原額。
既足供用。增添實爲虛糜。必不可。乃止。

丙寅。嘉靖四十有五年春正月。虜寇宣府塞。
虜寇西陽河。副總兵任勇率衆禦之。斬馘二十一級。虜。
乃引去。

二月。諭辛承天不果。

時承天大誌成。帝覽之。因欲南幸。諭輔臣曰。朕病久不痊。茲大誌成。欲一視承天拜。顯陵取藥服氣。此原受生地也。必奏功。諸王不必迎。從臣免朝。朕用卧輿以行。七月終。還京矣。徐階上言。聖躬未復。宜加意靜攝。而乃欲南幸承天。此豈崇護之道。亦豈所以上慰二祖之心也。其取藥一事。未知。皇上欲取何藥。宜開品味。諭撫按官取進。則聖躬不勞而坐。致上藥矣。帝又曰。自朕取龍飛諸殿圖閱視。已旬餘矣。遠近皆聞。科取小民寧免也。賴天下佑。一行必獲萬康。但先理途居爲要耳。階又言。前奉諭南幸。不敢仰贊者。第一爲聖躬計。第二爲國事計。蓋已亥至今二十七年矣。皇上

自度精力較彼時何如。雖皇穹下佑。必獲萬康。然輦行不及官居之安。途次不及殿廷之適。皇上崇護之道。自當避勞而就逸也。且巳亥以前。邊陲無事。彼時且命大臣行邊。及增內外城關守禦之備。今之邊警時聞。官兵未壯。而六飛遠狩。京師空虛。狡逆之謀。倘或竊發。聖駕在外。能無憂驚。此爲所當計慮者。至于有司科取小民。誠如聖慈之所軫念。而湖廣兵荒。撫按官節次奏陳。猶未暇及伏乞聖明俯亮下悃。毋致輕舉。以貽後悔。乃止。

三月吏部尚書郭朴兼武英殿大學士。禮部尚書高拱兼文淵閣大學士。俱入閣叅預機務。

時訥以有病告去。乃用朴拱入閣。

夏四月。以胡松爲吏部尚書。

六月。虜寇宣府塞。

總兵官馬芳禦却之。斬獲頗衆。

七月。浙江礦寇掠西安婺源諸縣。

西安縣有銅坑者。每有礦徒竊取市利。而豪右又爲淵藪。以勾致之。爲患不絕。郡縣嘗爲封禁。驅逐之。至姦民不逞者。假以礦利鼓衆。嘯聚數千人。大掠常山西安等五縣。環攻衢州。幾破之。官兵追逐乃散。其遊騎突入婺源縣。掠其帑藏而去。知縣李志學避匿得免。後以失陷城池論死。久之以婺源無城。乃末減之。

八月作紫辰宮。

九月新承天龍飛諸宮。

承天守備上言。宮殿滲漏棟椽朽損。帝謂輔臣曰。龍飛等宮殿六十餘年矣。今不可草次爲之。前謂一幸必行。可遣官吏建以備之。當下禮工二部先告。顯陵云。階上言。宮殿損壞。誠宜更建。但湖廣連被水災。一方之力。必不能辦。尤須爲之計處。帝問戶部。濟邊銀用。過幾何。同常支用。當有積者。未可云。朕親細事也。天降地產。民輸之財。豈可妄費。必須節愛。乃可耳。階上言。理財爲圖治要務。皇上今日之問。乃大計也。豈親細事。戶部誠當節愛。尤乞聖明丁寧之。帝曰。承天工料。彼

或不敷。工部節慎庫助之。亦可。階復言。臣適問雷禮庫中積金幾何。禮言每歲料價額派五十五萬兩。而負欠過半。支用不足。已借戶部銀十有八萬兩。各工應用矣。營繕司見貯止銀八萬。雖欲出助。亦不能也。久之。帝謂階曰。南工一時難建。姑修隆慶稜思二處而已。餘待裕時更建。遣去官匠。令速還京。階請御批行之。新渠成。

初。衡議鑿新渠。廷議從之。已而鑿未及半。雨潦濡之。功不能施。于是羣言紛起。謂移漕爲失計。彈章日上。帝亦疑之。衡幾不測。力上章言舊渠必不可復。新渠必所當開狀。帝從之。至是渠成。帝諭輔臣曰。衡雖小怨。

比極爲優。還留用。階上言。衡之治河。始而勘議。既濶。謂之無愆。固不可。終能有成。謂之無勞。亦不可。况河雖就成。而隄岸尚須營築。師捷尚須建。上源當䟽。下流當濬。此必須衡自終其事。蒙諭留用。知臣下之短。而不棄其長。真日月之明。天地之度也。

復設廣東巡撫大臣。

初廣東廣西各置巡撫。成化五年。御史龔晟等上言。兩廣事不協一。故盜寇益繁。宜設大臣總督兼巡撫而罷其巡撫。從之。乃復起韓雍爲右都御史督撫其地。開府梧州。居中節制之。正德十一年。改總督爲提督。已而惠潮二府山寇潛發。去梧州二千餘里。移檄往來。動經兩

月徵兵未集而寇已稠載去矣。上下苦之。因建議以二府割隸南贛。而南贛去惠潮亦復遼遠。況地屬代轄。徵發益艱。山寇潛滋。積久愈甚。邇年以來。城門不啟。道路梗塞矣。至是言官建議。宜復設廣東巡撫。從之。乃以李佑爲右僉都御史。巡撫其地。而廣西則隆慶三年亦復設焉。蓋因韋銀豹之亂。故命殷正茂往撫剿之耳。

冬十月。復兩淮鹽課舊額。

初。兩淮鹽課。歲七十萬五千一百八十引。徵銀六十萬兩。馮懋卿督理時。欲以增額爲功。請加至百萬。歲徵不足。則括郡縣贖鍰。及剝商人餘資。足之。商人至有破產者。怨嗟載道。御史徐爌上言其狀。帝命仍照舊額。是

歲商人頗安。至是戶部復以爲請。帝詢于輔臣。階言其始末從之。

胡松卒。以楊博爲吏部尚書。趙炳然爲兵部尚書。

胡松卒于官。帝欲用高耀爲吏部。階言吏部須清潔剛毅。耀于二者似皆未足。遂改博代松。而以炳然代博矣。

以兵部侍郎王之誥總督宣大軍務。

附錄帝諭階曰。沐朝弼怙終不悛。此地當預擇代者。非他鎮比。卿以爲何如。階上言。臣觀朝弼所爲。寔無改過之意。且其威權太過。雲南之人知有土王。不知有朝廷久矣。今爲久遠之計。誠當一處。但彼世守已久。亦難輕

動所以往歲加巡撫以贊理之術。蓋欲陰分其權也。而土官猛寅等。近日奏言。軍務當歸總兵。或言此乃朝弼嗾使。審爾意甚可惡。然使真出于土官。則其勢又可知矣。如得材良撫。臣默處得宜。然後奏請易之。斯爲上策。惜未有其人耳。彼人素富。多有爲之耳目者。萬乞皇上勿露罪之之意。機事不密。自古所深戒也。

十有二月庚子。帝還乾清宮。尋崩。壬子。皇子裕王即皇帝位。

上尊謚曰。欽天履道。英毅聖神。宣文廣武。洪仁大孝。肅皇帝。廟號。世宗。謚。孝潔皇后曰。孝潔恭懿。慈睿安莊。相天翊聖。肅皇后。孝烈皇后曰。孝烈端順。

欽惠恭誠祗天衛聖皇后俱祔太廟之几室祧仁宗適遷之葬帝未陵

論曰守已於徐少師階處蓋見世廟諭劄及改定旨草云人嘗謂輔臣擬旨幾于檀國柄乃大不然見其所擬帝一一省覽竄定又有不留數字者雖全當帝心亦必更易十數字示明斷有不符合意則駁使再擬再不符合意則劄譴讓或詰責之矣故閣臣無不惴惴懼者自古英明之主亡不受成事相臣銜上裁聲名而已攬乾斷如帝者幾何人哉國朝中亦惟高文及帝數君爾以故大張弛大封拜大誅賞皆出獨斷至不可測度輔臣欲有所與亦從吏

之或揣摩裨闔之耳。而能代有天工哉。帝聰睿夙成。宣哲天縱。思與古聖通。動與道法合。其財成典章。潤色鴻猷。皆有以洗濯千古。軼三五而上之。亡論東西京諸盛主也。其起弊亨屯。構欲傾之。鼎而厝之。磐石之上。尤大有鎮于宗祏不淺渺矣。則何以故。蓋帝有不世之奇謨六。無競之偉烈四。而又有震世之獨行五也。正世及之大辨。復四郊之大禮。黜胡主廟祀。革榮國侑享。崇奉先師。除象設之陋。釐正諸儒。嚴廸德之選。六奇謨也。革藩鎮之諸閹。廢畿甸之皇莊。奪外戚之世封。抑司禮之秉用。四偉烈也。正嬪御之數。內無女寵。放鳥獸之玩。外無禽荒。不以隆眷而廢。

刑誅不以令甲而拘除擢不以攝生而廢化裁五行
行也五行獨至故六謨顯而四烈彰所以駕二祖
所以邁百王帝道之隆于斯爲極矣於戲盛哉贊曰
於維肅皇神縱自天恢猷敦典室寶釐偏功高六
宗謨追古先享同二祖百世不遷